

CBETA電子佛典集成

CBETA Chinese Electronic Tripitaka Collection
eBook

J39nB448


靈機禪師語錄

清 行觀說

寂方等編（依駒本印）

財團
法人

佛教電子佛典基金會



目次

- [編輯說明](#)
- [章節目次](#)
 - [序](#)
 - [沈宗敬序](#)
 - [吳騏序](#)
 - [太珍序](#)
 - [目錄](#)
 - [住湖州武康翔鳳山顯忠崇孝資福禪寺語錄](#)
 - [住嘉興府石門縣福嚴禪寺語錄](#)
 - [小參](#)
 - [示眾](#)
 - [機緣](#)
 - [垂問](#)
 - [勘辨](#)
 - [早參](#)
 - [晚參](#)
 - [落堂](#)
 - [源流頌](#)
 - [頌古](#)
 - [書問](#)
 - [老人命代復曾心空居士](#)
 - [復海鹽張禹侯居士書](#)
 - [復福嚴靈嶽和尚](#)
 - [與梁日章居士](#)
 - [與北京張顯侯孝廉](#)
 - [復朱太赤文學](#)
 - [復沈虎臣居士](#)
 - [復海鹽張小白內史](#)
 - [復虛白西堂](#)
 - [復福嚴古風和尚](#)
 - [與至印西堂](#)
 - [與滇南茹蘗西堂](#)
 - [復石門曹遠思司理](#)
 - [復曹遠思司理留再住福嚴](#)

- [與白雲子素上座](#)
- [答嘉禾頂居士](#)
- [雜偈](#)
 - [復本充禪師](#)
 - [募禪堂瓦](#)
 - [化米](#)
 - [化油](#)
 - [復朱同文偈](#)
 - [募鑄大鐘](#)
 - [募脩安和寺](#)
 - [化碗](#)
 - [東茆蓬妙宗禪人乞偈化米](#)
 - [化布袋](#)
 - [題扇示慈雲禪人](#)
 - [丐大銅鍋偈](#)
 - [寄白雲子素後堂](#)
 - [即事](#)
 - [受普寧請荅諸禪德](#)
 - [回闍省親](#)
 - [送僧之武夷](#)
 - [除夕](#)
 - [金粟主山](#)
 - [神書藏經](#)
 - [寄友](#)
 - [鏡菴坐雪](#)
 - [聞孤松壽徒訃燈下四吟](#)
 - [過江郎](#)
 - [示慧初上人](#)
 - [御書樓](#)
 - [仙螺池](#)
 - [鉢盂案](#)
 - [九龍戲水](#)
 - [治升菴居士薦室請偈](#)
 - [甲午春贖大塢古院基樹](#)
 - [和海寧顧呂侯韻](#)
 - [示法則禪人](#)
 - [中元薦親](#)
 - [示星幢師姪](#)

- [坐大展記室寮觀桂偶成](#)
- [除夕述懷](#)
- [解制有感](#)
- [寄天孚上座](#)
- [示華嶽居士](#)
- [示幻觀侍者](#)
- [示心宗上座](#)
- [募興造](#)
- [化豆](#)
- [化醬缸](#)
- [化齋米](#)
- [募藏閣](#)
- [明初許居士為先室行敏請偈薦拔](#)
- [直讚](#)
 - [雪峰瓦和尚像](#)
 - [棲霞禪德行樂圖](#)
 - [敬安師像](#)
 - [朱問心居士像](#)
 - [跋平陽弘覺和尚為張明遠居士所題直讚](#)
 - [張舜法居士請為先嚴明南公像讚](#)
 - [浩如大展二上座為母超琛并自像請題](#)
 - [棲水玉聲德聲昆仲請為先嚴聖裔呂公像讚](#)
 - [鷲生禪師像](#)
 - [月臨上座像](#)
 - [張道婆行樂圖](#)
 - [汪際斯居士乞題父臨終所書大士像](#)
 - [文益禪師像](#)
 - [東來戒子像](#)
 - [福嚴老和尚像](#)
 - [自讚](#)
 - [至印方首座請](#)
 - [法立系西堂請](#)
 - [嵩菴正藏主請](#)
 - [子素學後堂請](#)
 - [鐵山岑維那請](#)
 - [利禪恒藏主請](#)
 - [寶相卓知藏請](#)
 - [巢風林藏主請](#)

- [大展翼書記請](#)
- [璨衲章知客請](#)
- [薦穀嚙藏主請](#)
- [止水智藏主請](#)
- [德水洧侍者請](#)
- [荊石侍者請](#)
- [英衲穀禪人請](#)
- [乾一知藏請](#)
- [英發知客請](#)
- [元崎知事請](#)
- [東來戒子請](#)
- [佛事](#)
 - [挂板](#)
 - [為東明孤雲和尚火](#)
 - [入塔](#)
 - [為韶明和尚起龕](#)
 - [舉火](#)
 - [入塔](#)
 - [為慈門師太封龕](#)
 - [起龕](#)
 - [舉火](#)
 - [為嵩嶽監院火](#)
 - [入塔](#)
 - [指琦維那火](#)
 - [觀顏柴頭火](#)
 - [文光禪人火](#)
 - [聰睿庄主火](#)
 - [為禪人火](#)
 - [象開禪人火](#)
 - [月脩火頭火](#)
 - [濟牛禪人火](#)
 - [澤超禪人火](#)
 - [智恒禪人火](#)
 - [湛輪相侍者火](#)
 - [入塔](#)
 - [少眉禪人火](#)
 - [飯頭定心禪德火](#)
 - [湛如禪人火](#)

- [淨朗禪人火](#)
- [值牲慈茂火](#)
- [不較上座火](#)
- [漏也上座火](#)
- [鵠林維那火](#)
- [鍾解脫火](#)
- [巨範則副寺火](#)
- [聰聞會禪人火](#)
- [素慆汧西堂入塔](#)
- [松江二禪人入塔](#)
- [為孫弘寔父母入塔](#)
- [清如耆舊火](#)
- [青蓮老師火](#)
- [慧林禪人二親化柩](#)
- [木頂禪人火](#)
- [朱解作明采火](#)
- [道戒禪人火](#)
- [慈濟禪德火](#)
- [行狀](#)
- [塔銘](#)
- [誌](#)
- [後跋](#)
- [卷目次](#)
 - 1.
 - 2
 - 3.
 - 4.
 - 5.
 - 6.
- [贊助資訊](#)

編輯說明

- 本電子書以「CBETA 電子佛典集成 Version 2023. Q4」為資料來源。
- 漢字呈現以 Uni code 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

重刻靈機禪師語錄原稿序

靈機禪師得法於金粟費老人為其白足後闢講堂於翔鳳為資福之開山祖所傳語錄舊有鈔本宗門推尚之久矣今其法嗣大展繼席資福以舊本之未盡厥傳也將重加訂正梓而行之請序於余余聞禪門之學空諸所有不立文字即其當機問對一言半偈要歸其旨於虛寂而已靈師實能洞徹斯旨故其生平言語不令其徒撰錄舊本所載亦其侍者得於睹記潛鈔而授之梓用以廣其師傳耳非靈師之意也今大展見謂未備又欲刻之何歟蓋釋氏之教雖與儒者歸趣不同至於審辨源流尊信師說俾天下後世因其言以知其人而其教澤亦藉以不墜其用心則一也韓子有言孟軻氏未嘗著書今其七篇乃萬章公孫丑之徒相與紀其言而傳之耳由是言之假令當時無尊信師說如諸子其人者則孟氏之書不傳百世而下安能使其名赤赤卓卓為群儒冠哉大展侍靈師最久得其宗旨獨深其所睹記比他人尤詳不欲令其師傳之稍有湮沒也則其於是役也能無亟亟乎余喜大展之尊信師說與吾儒同而靈師之教澤亦藉其人以益廣也故不辭而序之。

賜進士出身翰林院庶吉士華亭沈宗敬撰

刻正靈機禪師語錄原稿序

昔玉林和尚語諸弟子曰天下宗師靈機第一蓋師為海內所推服稱臨濟正宗一語一默一顰一笑皆甘露也師示寂後有弟子急於入都倉卒梓師語錄二卷攜之北行時入室弟子大展方養母他山未得預聞後繼席翔鳳見錄中改誤多端前後易置不勝驚惋謂先師語錄乃一代人天眼目安可淆訛失序欲悉依原稿刻正垂示百世俾吳騏為敘騏謂語錄與文章異文章之家研京十年練都一紀追琢求工故可改也語錄出自見地如火必熱如水必溼如金必堅如刀必利豈容商酌擬議哉不待商酌擬議而一切賓主炤用殺活與奪性靈手眼千品萬偈無所不備譬人始生五官百骸腑臟膏血八萬毛孔一時具足若有刪改文飾則是裝偶塑像非生人也人已生矣而欲脩削之雕琢之豈非事理之萬萬不可者哉昔歐陽公以舊唐書張濬傳中做面子三字不雅改為作態識者謂做面子三字意忌而含怒氣傲而詞強作態二字意謔而含笑氣柔而語弱情事全失不如舊書遠甚夫歐公之才且不能輕易改書而況不如歐公者也藥山聞雲巖一言曰吾於此得見海兄百世之後有讀語錄而見靈機真面目者大展之力也夫。

甲戌初冬九峰遺黎吳騏頓首拜撰

序

古有言行解相應名之曰祖今之據名剝踐祖位者說法如雲如雨譬效如珠如玉察其所為則行不副解解不副行總被二風所觸傲然竊名於祖位可乎惟吾楊墳觀和尚幼陞天童之堂剗心礪志真參實悟直躋金粟堂奧倒捋逆批費老人素稱室中真子也厥後住山三十載足不踰閭故能不起于座化荊棘為寶坊無法當情辨龍蛇於叱吒其激揚宗旨萬指鏗鏘即飽參宿學之士一嬰其鋒靡不訥縮咋舌而退是以喻其刻苦蒞眾則如珠走雪床之楊岐也論其頌古渾樸則如敲金戛玉之白雲也觀其機用敏捷則如縱奪臨時捉敗同參之興化也至若開法四十年來法語機緣甚夥每呵今時別傳之旨泥於文字禁止謄錄既沒而無隻字示人則又跂乎雲門諸老之上矣茲所行於世者其門人久侍潛鈔密記輯集而成書蓋十存其一耳嗚呼和尚之行解卓然足以邁古超今滅卻正宗之嫡髓詎在多乎是為序。

前住龍池法弟大珍拜題

靈機觀禪師語錄目錄

- 卷首
 - 序文
- 卷一
 - 陞座
 - 小參
 - 示眾
- 卷二
 - 機緣
 - 垂問
- 卷三
 - 勘辨
 - 早參
 - 晚參
- 卷四
 - 落堂
 - 源流頌
- 卷五
 - 頌古
 - 書問
- 卷六
 - 雜偈
 - 真讚

- 佛事
- 卷尾
 - 行狀
 - 塔銘
 - 跋
 - 誌

靈機觀禪師語錄目錄(終)

靈機觀禪師語錄卷一

嗣法門人 寂方 智霈 海汧 超系 等編

住湖州武康翔鳳山顯忠崇孝資福禪寺語錄

陞座師自崇禎甲申春誅茅翔鳳至順治甲午冬眾求結制海鹽徐君載護法夫人行脩請陞座僧問豁開戶牖妙手難描當軒者誰抬眸錯過師以棒擲開云到即不點進云祇如強項不回頭者和尚如何施設師云且居門外進云門內底又作麼生師云自招款案問大制從來無結解因何平地起風波師云早知恁麼已是遲進云天上天下惟吾獨尊去也師便打云轉見郎當問翔鳳峰前呈瑞色鉢盂山上播祥光佛法大意即不問開鑪結制事如何師云好向風頭看火色進云謝師指示師云也須眼底辨金鉅問翔鳳峰頭作舞十方海會雲臻就中一句應時及節請師宣師云祇要腳踏實自然眼豁開進云為憐三歲子不惜兩行眉師云識得山僧也未進云吞納大千門不二堂堂廓落露全機師便打乃豎拂子云此便是當年驚嶺微笑一著子恁麼見得則黃面老子金色頭陀一肩擔荷徹體無多直得正法眼人人今古彌互涅槃心箇箇歷劫不磨掃卻從前閑露布那來迷悟涉洊訛忽有箇傍不甘底出來道是則是今日剋期立限也是平地干戈驀與他一棒云無繩索縛英靈漢汝又將身入網羅。

鹽官張行脩居士同室沈氏壽誕請陞座師云抱膝鳳山下常年口懶開那堪輕漏泄今日又重來諸兄弟來也來了說無可說何故千說萬說原是一說千聞萬聞祇是一聞若也見得則昨日說今日說說說自超越昨日聞今日聞聞聞絕比倫方信本來一著子迴超天地獨為尊忽有箇衲僧出來道者漢前言不顧後語好與三十棒但向他道汝擔得好板棒我也甘喫爭奈武原人未肯點頭在乃揮拂子云但願春風吹不老瞎驢笑得口門開。師誕自慶禪人請陞座師云釋迦不出世達摩不西來佛法遍天下談玄口不開諸兄弟向者裏會得還有佛祖立地處也無還容觀上座說青道黃也無殊不知未生面目箇箇全彰觀體風光人人具足回觀三藏十二部是甚熱碗鳴聲一千七百則是甚狗咬枯骨正眼看來無夢說夢無事生事正好

朝打三千暮打八百忽有箇漢聞與麼道憤性出來道資福你者般饒舌已
是好肉剗瘡欺陷平人資福終不壓良為賤拄杖子兩手分付何故舉揚恁
麼事須是恁麼人幸有恁麼人方諳恁麼事其或不然未免死水裏藏龍欲
構宗門向上事何啻萬里望潼關雖然如是今晨自禪人製法衣為我慶壽
諸兄弟慇懃強我舉揚且道說箇甚麼即得若說有生有死卻是病目見空
花若說無死無生又是怖頭走他國去此二途如何端的阿呵呵當初只謂
茅長短燒了元來地不平結制陞座師云未過楊墳渡撒手便回決無今日
事既過渡來結住布袋口縱有韜略卒無用處且如何是今日事諸人還知
麼若也知得畫地為牢終非究竟無繩自縛豈自甘休直須活潑潑如俊鶻
沖霄赤灑灑似錦鱗破浪苟或未然勸諸人莫廉纖安排不是佛扭捏亦非
禪千盃不醉風流子吸盡西江不(費錢)師誕日雲間茗雪眾居士請陞座
問答不錄師云昨日者箇時節全無消息卻有巴鼻今日者箇時節雖無巴
鼻卻有消息若向昨日會去爭見今朝消息若向今日會去難辯昨日巴鼻
說是語時巨耐翔鳳峰忍俊不禁牽拽鉢盂案開口大笑直得天落山與大
遮山睜眉怒目一齊震動嚇得瞎驢隊裏跳出許多泥牛白牯徬徨四顧未
得翻身山僧見其恐怖生心連忙捺出老婆心懸挂刹竿上乃向道汝等善
生瞻仰此段微妙難信之法乃自心現量境界只要返本還源便踏故鄉田
地於是翔鳳峰鉢盂案天落山與大遮山方得歡喜讚歎合掌而作偈言業
擊禺山債未休知非已過又從頭耙犁雖不拖泥水耕遍乾坤四海流喝一
喝下座。

師誕日棲水眾居士請陞座僧問昔日釋迦離兜率降王宮意旨如何師云
南山起雲進云指天指地目顧四方唯我獨尊又作麼生師云與汝通箇消
息進云雲門曰我當時若見一棒打殺與狗子喫且道是雪屈是報恩師云
丈夫氣宇合如斯進云今日吾師出世還有為人句也無師云重說偈言進
云茗水今朝年半百漆園贏得八千椿師云也要大家知問桃花放小春欲
結千歲實為復是慶生為復是應時師云分別即不得進云昔日靈雲見便
悟如何是悟底意旨師云鼻孔大頭垂進云今朝資福不知幾多人悟去師
云惺惺者惺惺懵懂者懵懂進云和盤托出從人薦只要諸人鑑本真師云
一任轉量僧禮拜桃含章居士問釋迦降生九龍吐水和尚示誕有何祥瑞
師云謝居士齋進云蒙師指出波心月箇裏寒潭徹底清師云要汝自承當
乃云資福五十年來不曾咬著一粒米且道噉箇甚麼五十年來不曾挂著
一縷絲且道穿箇甚麼於斯明得不惟日消萬兩黃金亦合受四天下供養
於斯不明粒米寸絲也當拖犁拽耙償他始得大眾因甚如此得人一牛還
人一馬下座。

大殿上樑陞座師云闢艸開荒全憑衲子扶揚插標建刹猶賴龍天呵護無
龍天呵護難繼昔人遺蹤有衲子扶揚方成今日叢席雖然此猶是建立門
庭邊事正眼觀來盡大地是寶王刹何興何廢何古何今遍刹塵是淨法身
誰增誰減誰聖誰凡既無聖凡增減又無古今興廢則現前大眾若僧若俗

若男若女乃至遠近檀護不期自集便合迴光返照悟明得去則寶王殿內人人立地有分淨法身中箇箇觀體無二倘或未諳向第二義門更為諸人通箇消息村歌社舞喧天鬧笑看虛空架畫梁卓拄杖下座。

逸凡上座同雲間眾居士送大鐘入山請陞座師云法門有大器乾坤絕覆藏赤身擔荷漢渴力為敷揚敷揚喜有其人祇如大器到來如何與伊證據卓拄杖云向者裏證據得去皇恩佛恩一時報畢檀施法施兩得相酬更說甚麼聞聲悟道方諳箇裏端倪見色明心始信本來是佛然則今日法柄在握畢竟令歸何地復以拄杖向空點云若將耳聽終難會眼裏聞聲方始親。

逸凡上座領雲間民仲吳居士六句請陞座首座問有物先天地無形本寂寥既是無形又喚甚麼作物師云主山恒突兀進云能為萬象主不逐四時凋目前萬象森然四時代謝作麼生是不凋底意旨師云澗水自長流進云祇如居士誕期敦請說法未審如何慶讚師云合寺人多慶進云恁麼則華亭信有千年鶴今日親從海上來師云共謝飽香齋乃云昨夜翔鳳關與禹泉亭爭論甚鬧一謂佛法貴要乘時宣說一謂佛法不可輕易流布卻被鉢盂案開口大笑山僧忍俊不禁各與三十拄杖試問者三十拄杖還有賞罰也無若有賞罰在甚麼處若無衲僧眼何在民仲吳居士你是雲間伶俐漢聞者般說話便與麼會去不惟罔極之恩今已報盡則本來壽量亦見延長祇如天台頂上行忽逢南海天平僧又作麼生遂揮拂云盡把無生消息露卻來人世樂逍遙。

塘棲沈君善居士為母十週送法衣請陞座止水問生死交謝寒暑迭遷有物流動人之常情只如無陰陽地上如何舉步師云你即今在甚麼處進云祇如沈居士請法薦親且道功歸何所師云腦後著眼看進云與麼則生身父母居堂上從本爺娘在頂門師云何曾離者裏進云一念頓超諸祖意者回方始報親恩師云又要重添註腳問昔日世尊說法天雨四花地搖六震今朝和尚陞堂豎拂拈椎現何祥瑞師云腳跟齊點地進云翔鳳峰頭祥霧地鉢盂巖畔瑞雲生師云風光溢目多問人天普集選佛場開為人一句如何舉唱師云一棒一條痕進云萬象森羅咸稽首大千沙界盡沾恩師拈棒云會取棒頭旨僧禮拜師乃云祖師西來初無奇特一念回機便同本得只是不合誤賺老神光斷卻一臂帶累自家失卻一隻者一隻那一隻東土與西天無處得尋覓阿呵呵若是明眼人終不受渠惑復舉長水問瑯琊覺楞嚴經云清淨本然云何忽生山河大地瑯琊抗聲云清淨本然云何忽生山河大地長水當下悟去師云據古人恁麼問答且那裏是長水悟底道理若明得長水悟底道理便明得今日[淡-火]君翁為母十週敦請薦拔山僧功不浪施雖然伶俐漢向者裏悟去山河大地忽生且止要且清淨本然又從甚處得來還委悉麼返本還源諳落處齋衣請法入山來須知一念全彰處觀面慈容笑眼開卓拄杖下座。

棲鎮眾檀護送藏經到山請陞座問答不錄師云棲水諸居士請藏入山來山僧無法說合掌笑盈腮何故蓋此山自唐宋迄今數百餘載為江淞最大名藍歷代尊宿存名計住者共三十餘位嗣後年代既爾深遠興廢亦復多番荊蓁蔓艸觸目荒涼山僧勉力拮据同眾株守數年以來羶成叢席實自無心有所希求今此法王大寶自然而至豈非法門一大盛事哉雖然此猶是敘述茲山履歷之意表揚此藏際會之緣若據當人一著本來具足須知三藏十二部一切脩多羅驀豎拂子云皆從者裏流出諸人若也會得便見今日諸檀護發殊勝心成殊勝事亦皆從者裏流出且道者裏又向甚麼處流出還委悉麼不辭潦倒明宣破只恐剗傷好肉瘡卓拄杖下座。

棲水邵文孚居士薦親請陞座茹檠首座問樹欲靜而風不停子欲養而親不在令人常憶蓼莪篇罔極之恩喻覆載正與麼時酬恩一句作麼生道師云解脫門開喜到來進云古人道今生父母當親近從本爺娘仔細看祇如從本爺娘作麼生看師云覲面團圞絕覆藏進云恁麼則生死涅槃皆是夢嚴慈何處隔纖毫師云知得恁麼方解恁麼乃云雲在嶺頭閒水流澗底忙不知何大意終日自掀揚諸兄弟便與麼會還得心境一如也未還得物我雙忘也未若未得心境一如物我雙忘到者裏也須是箇漢方能赤灑無依風流自在不見盤山和尚道心月孤圓光吞萬象光非炤境境亦非存光境俱忘復是何物洞山云光境未忘復是何物大慧云白鷺下田千點雪黃鸝上樹一枝花我先天童密師翁云孟八郎漢又恁麼去也從上尊宿直截為人無非發明者箇端倪者箇端倪明了然自亦不知是箇甚麼若有甚麼可知即墮在無為無事人猶患金鎖難行腳高流參尋箇事者般旨意大須審細山僧今日說此無上大法蓋為文孚居士請薦二親用報罔極之恩罔極之恩既報且道他二尊人即今在甚麼處安身立命遂卓拄杖云急著眼莫沉吟自從股落霜刀後遍界分明淨法身便下座(居士曾割股療親)。

德水上座領棲水思蓮尼并眾善信送法被請陞座僧問猊座高登人天普集少室家風請師吐露師拈拂云分明祇者箇進云此是衲僧尋常見解祇如針筭不入處又如何通信師云又被白雲迷進云學人識得和尚了也且道今日塘棲眾善信齎送法被功歸何所師云功歸何所則且置作麼生是識得山僧底意進云與麼獅子吼時芳艸綠象王回顧落花紅師呵呵云切忌重露布撥過那邊立僧禮拜云因師置得師云又要拖帶問密密金針鋒不露綿綿玉線縫偏長到來一眾咸胥慶師意如何為舉揚師云惹得春風動地來進云祇如重重寶蓋自天垂朵朵金蓮從地湧時如何師云上座也須著眼觀僧禮拜云天上人間得自由去也師云猶落路頭在進云意氣不從他處得風光自是本來同師云但願恁麼去問揭開幔天網突出獅子吼百獸盡潛蹤龍象笑開口如何笑開口一句師云炤顧腦門裂進云世尊未離兜率已降王宮和尚未出母胎度人已畢正恁麼時坐斷當陽且道度箇甚麼師曰更要覓阿誰進云恁麼則龍得水時添意氣虎逢山勢長威寧師打云猶要棒喫僧喝師云不信道問那邊親證一回卻來者邊行履者邊事

即不問那邊事作麼生師云覲面相見了何必又重宣進云向上還有事也無師云有進云如何是向上事師垂拂子云試看者一著僧禮拜云到家更不涉程途去也師呵呵大笑乃云天然妙手出格針鋒繡成古錦金獅現突踞當陽氣象雄諸兄弟似者般容妙猶是描畫邊事尚爾驚群絕勝儼然如活何不返觀當人一著向描畫不及處一覷覷透自家面目方知此事不從人得要知此事不從人得便是玄沙[祝/土]破指頭回雪峰峰問偈頭陀何不遍參去沙云達摩不來東土二祖不往西天教某甲參阿誰山僧當時見玄沙明此消息不覺豁開笑眼如在萬人叢裏輒出相似所以尋常敢道雲門打釋迦未是好手臨濟掌黃蘗猶欠忤逆須知更有一人越過臨濟雲門之見方堪語話既越過雲門臨濟之見了又要語話箇甚麼是汝諸人還知翔鳳老漢立地處麼自從打落青天後笑看森羅萬象奔卓拄杖喝一喝下座。

棲水鄒吉人居士為母六秩請陞座師云楊墳深口鍤般易過資福門前直路難行那來龍象眾滿座競崢嶸繞圍聽我法我法絕形名白棒當頭指羈拳覲面呈都教箇箇風流脫灑直令人人手眼精明鍤饅頭喫飽齣齣無米飯克滿騰騰是則是忽有箇漢出來問秬如今朝者般受用從何而得但向他道源遠流長棲水綠萬年森鬱鳳山青卓拄杖下座。

棲水張瑞宇居士同室夏氏五秩請陞座問答不錄師云幻夢浮生五十春團團琴瑟共同倫轉頭一念彌今古信荷金剛不壞身山僧已為居士祝壽了也直得三十餘代老古錐騰身踴躍合掌證據云是真語者實語者如語者不誑語者是你諸人還見麼若也見得便見當時澧陽路上賣餅婆子因德山肚餓要點心婆問金剛經中道過去心不可得現在心不可得未來心不可得上座擬點那箇心山無語後到龍潭向紙燈吹滅處豁然大悟且道悟箇甚麼還是悟三心不可得耶悟紙燈吹滅耶伶俐漢向者裏一覷便破不惟穿卻那婆子風流鼻孔亦可與老德山把臂共行若猶未也謾道咽喉遭餅塞眼睛突出始超方喝一喝下座。

師六旬誕日雲間樵李雪溪眾護法請陞座問答不錄師云今日春風何處來滿筵龍象盡欣懷山僧不會欣懷意但見諸人笑眼開雖然山僧既不會固是窺覷無門諸人笑眼開且道明甚邊事若有所明因甚山僧不會若無所明笑眼開底又是箇甚麼到者裏描固不成畫亦不就匄圖拋出莫閒休咎生鍤面皮既絕攀躋破沙盆子那來歲壽乃呵呵大笑云青山耐盡冷冰心誰道今朝又漏逗。

解制陞座僧問九旬已滿即不問魚龍變化是如何師打云看汝轉身來進云頭角養成忝意氣大千何處不風流師云直須腳踏實地始得僧禮拜云謝師答話師云一句好愁人問春光和暖百花新未降王宮已度人解制今朝即不問當陽慶讚若為陳師云本來清淨體脂粉漫塗糊進云翔鳳山頭呈瑞氣鉢盂案上獻醍醐師云妄想幾多人問嶺上二枝春爛熳瓊樓玉殿發光輝且道是甚麼人境界師打云面目甚分明僧喝師云棒頭開正眼端

的始知歸乃云一冬與諸人眉毛廝結今日擬欲開交且道箇甚麼即得若道去則有鉤鉤汝未免按牛頭喫艸住則有錐錐汝也是平地上起堆爭如鉤也不施錐也不用一條古路八字打開一任諸人南天台北五臺逗到羅紋結角之際忽地踏斷石梁橋擊碎玻璃盞寒拾豐干非從外見金毛師利觀面相逢方知資福一片老婆心為諸人徹困自是諸人不會所以道聖號凡名盡是虛聲殊相劣形皆為幻色汝欲求之得無累乎及其厭之又成大患與麼說話仔細看來大似描畫虛空徒勞指註且作麼生是真實為人一句歸家盡是兒孫事祖父從來不出門。

雲間眾居士請陞座止水問昔日嬌尸迦與古佛裝像果感天主即今雲間義友十人請師為眾舉揚當獲何果師云且喜春風動地來進云與麼則昔日古佛今朝和尚也師云你又分身兩處看進云可謂人人開正眼箇箇豁頂門去也師云如何是你正眼進云夾路桃花風雨後馬蹄何處避殘紅師云狼藉不少乃云負沖天氣概必具參尋眼目入作家爐鞴須盡妙手鉗鎚鉗鎚未盡末後牢關終隔礙眼目不具陷身螯甕受迷籠驀拈拄杖云然則者箇終朝列列挈挈長年挺挺特特具何眼目入何爐鞴若也辨得便可七縱八橫以一莖艸作丈六金身瓊樓玉宇掌中觀坐微塵裏轉大法輪大千沙界腳尖上即今鍤饅頭一任橫吞豎咬無米飯不妨端坐受供如或未然雲間路杏翔鳳峰高難弟難兄親到此也須各各動寒毛遂卓拄杖下座。

住嘉興府石門縣福嚴禪寺語錄

康熙辛亥歲師受嘉禾石邑眾紳衿諸護法暨本山兩序耆舊請於九月十二日進院至。

山門師以杖指云此是先師當年開闢之處英賢代起盡出斯門山僧今日到來又且如何舉步飲水知源開眼笑鍤船無底渡崑崙。

佛殿一言獨稱尊傍觀幾打殺多少不平人含冤而怒說休怒說從今不必動干戈海晏河清唱哩囉。

伽藍自受靈峰囑千觔擔子挑我今承護念庶事賴和調雖然更有一句子也要互相委悉遂插香云此心無媿赤條條。

祖師眼眼蒼黃色鼻鼻柏子香雖然無可語箇箇舌頭長咦不是兒孫今看破早將家醜外邊揚。

據室若論此事山僧不敢苟順人情何故蓋者裏是先師行綱立紀為法存公之處若以本分未徹履踐未當糶糊學者罪犯彌天且道新福嚴以何為人一陌清風穿鼻竅眼開不受自欺瞞。

當日眾護法請陞座問答不錄師云佛法自有時節因緣不可覆藏憶自先師辭世山僧以心喪株守翔鳳迄今十載志在鈍鑊頭邊鋤雲補衲遂此餘生無奈業力難逃被那隊神通羅漢并諸妙用維摩鉤住鼻端必欲牽拽至語水河畔仔細思量實無計可只得老牛拖重耙從迎恩渡過勸農橋登師

堂入師室據師座凡先師所屬疆界一一勉力維持祖父者片田地處處徹底翻覆繼往開來悉憑前數酬恩報德盡在今朝遂顧視左右喝一喝云不是山僧多潦倒大都父業子承當卓拄杖下座。

護法曹遠思同弟正則子巖為母太夫人八十壽請陞座僧問祝一人無盡之壽開十方選佛之場建殊勝緣作奇特事忽有箇無面目漢到來如何相待師豎拂云祇將者箇為證據進云與麼則覲面相呈更無回互去也師云須是恁麼始得進云可謂是處是慈氏無門無善才師云此句是重言問天垂寶蓋地湧金蓮為是法爾如然為是神通妙用師云總不恁麼進云還丹一粒點鍊成金至理一言轉凡成聖今日太夫人壽誕請師至理一言師云千年蟠桃核進云昔日世尊陞座文殊白椎云諦觀法王法法王法如是未審意旨如何師云有眼盡皆見進云恁麼則寶劍一揮天地靜雙眸纔舉斗牛寒師云脫體任風流進云學人禮拜去也師卓拄杖云不堪與麼僧一喝師云又欠端的問鐘鼓交參龍象雲集滿座風光承誰恩力師云杲日見當空進云恁麼則壽算等空誰比量福同滄海若為倫師云何勞讚歎乃云今日一眾咸集座下擬聽山僧為太夫人說法稱壽且道說箇甚麼即得若說世間法渠自興家立業教子育孫乃至發科發甲為官為貴冰霜凜冽節儉維風可謂巾幗丈夫早已傳頌閭里又烏用山僧彈述其萬一若說出世法渠自皈向先師信荷宗乘將四十載衛護此山垂老不忘非宿願弘深焉能諄切若是所以凡海內衲子知有福嚴叢林者莫不知有曹氏金湯之力如是則太夫人壽如福嚴與天中並垂不朽壽如語水同碧玉深濬無窮直得森羅萬象俱呈瑞彩山河大地遍覆祥雲皆是太夫人本有之物亦是先師光明之幢是你諸人還覺眉毛卓朔麼山僧已自忍俊不禁再為助揚一上遂呈起拄杖云不涉陰陽超物表當堂彌播古今春復以拄杖架肩下座。薦亡請陞座僧問一念無為俱坐斷森羅影裏現全身此猶是教乘極則邊事如何是衲僧向上鉗錘師云又添一箇癡獸進云生也不道死也不道即今姜氏超蓮面目何在師云拶得盲人眼自開進云了了常知無別物凡名聖號等浮漚師云炤顧腳下乃云浪走江湖腳跟下三十未為多穩坐家堂頂門上一錐已是遲若是明眼衲僧直須翻轉面皮方能克紹綱宗擔荷箇事且箇事又如何擔荷揮拂子云信手拈信手舞大坐當軒孰敢睹或示太阿鋒或震塗毒鼓直得歷代老古錐箇箇相看把舌吐作驢作馬掣風顛現神現鬼相觸忤撞頭磕額沒處藏罪犯彌天不可數不可數休莽鹵打破生死關無佛亦無祖生死關既已打破且道已往姜氏即今居何方所遂合掌云頓超上品蓮了脫幽冥苦。

小參

解制何君佐居士同室沈氏請小參一期切切怛怛且喜眉毛還在未免因齋慶讚唱箇好春光為諸人助行好春光好春光箇箇娘生面目彰陽翻磬

甕冲霄去擺脫鉤錐步大方莫靠壁休倚牆大丈夫兒貴自強若使艸鞋不具眼腳頭常被石頭傷石頭傷血染青山路轉長盡道天涯無日到誰知回首是家鄉咄咄咄者獸郎莫漫狂三十年前太古話如今說出不成腔任他不采聽自說也何妨遂噯呀一聲云笑斷老婆腸。

除夕小參召大眾云一年三百六十日與麼磨裙擦褲虛度時光了也今宵卻值臘月三十夜古人喻為生死到頭最是急切底時節祇如當人腳跟下一著子合作麼生理會山僧雖則無事生事也要大家委悉倘有直下知歸者不妨如龍得水似虎逢山展托當機牙爪施呈本有風光其或未然更為諸人打葛藤去也驀卓拄杖云年去年來春復冬衲僧巴鼻若為通瞿曇有口難宣說摩詰無言謾指蹤歷劫不磨非向背當陽突出絕施功等閒脫體能擔荷任運堂堂不借中。

福嚴退院小參師呈拄杖云盡大地是先師面目全憑者箇為流通遍刹塵是山僧行履了無住著可追攀雖然要見山僧行履須明先師面目既明先師面目且道山僧行履在甚麼處遂起身云多謝勸農橋上兩殷勤送我出松關拽杖便行。

示眾

封鍋示眾觀上座今晚封鍋不為別事祇為諸兄弟擔囊挈鉢不憚身力到資福者裏箇箇業為參禪學道了脫生死然既為此大事急切而來豈可辜負故時就此急切處置一問祇如禪作麼生參道作麼生學生死作麼生了若向者裏著著有出身之路答得一語相契不妨依舊開鍋大家同住若答不得便請檢點行囊各各散去資福無閑飯與汝喫虛度光陰打關過日蓋緣邇來祖道衰微禪風澹薄主席者多懈怠之士行腳者少正因衲子遂使參禪學道了脫生死一段大事因緣卻成虛設良可痛也故觀上座今晚捋下面皮不避嫌謗逆行此令弗圖門庭繁盛只貴正眼流通乃顧左右云出來道道看一僧云文不加點師云汝者一語在禪上著道上著生死上著僧云和尚檢點看師云情知你未諳落處慣弄虛頭僧無語師復高聲云還有麼良久眾無出師云不意命蹇若是與麼拼身捨命入艸求人覓箇同伴也不可遂打翻香几歸方丈。

示眾舉世尊於涅槃會上以手摩胸告眾曰汝等善觀吾紫磨金色之身瞻仰取足勿令後悔若謂吾滅度非吾弟子若謂吾不滅度亦非吾弟子時百萬億眾悉皆契悟師云世尊末後賣俏如將魚目當明珠百萬億眾悉皆契悟也是烏龜撞壁且道山僧如是批判意在甚處貪觀天上月失卻手中撈。

示眾門前犬子吠畢竟有人來且道是什麼人眾無對師良久云原是舊相識不用別疑猜。

示眾舉世尊因長爪梵志索論義預約曰我義若墮當斬首以謝世尊曰汝義以何為宗志曰我以一切不受為宗世尊曰是見受否志拂袖而去行至中途有省乃歎曰我義兩處負墮是見若受負門處羶是見不受負門處細一切人天二乘不知我義墮處惟有世尊諸大菩薩知我義墮回至世尊前曰我義兩處負墮故當斬首以謝世尊曰我法中無如是事汝當回心向道於是同五百徒眾一時投佛出家證阿羅漢師云外道最初拂袖便行卻具衲僧作略可惜中途捩轉面皮又向世尊腳跟下納敗正似靈龜拽尾自取喪身之兆。

示眾舉世尊因文殊至諸佛集處值諸佛各還本處惟有一女子近於佛坐而入三昧文殊乃白佛云何此女得近佛坐而我不得佛告文殊汝但覺此女今從三昧起汝自問之文殊繞女子三匝鳴指一下乃托至梵天盡其神力而不能出世尊曰假使百千文殊亦出此女子定不得下方過四十二恒河沙國土有罔明菩薩能出此女子定須與罔明大士從地湧出作禮世尊世尊敕罔明出罔明卻至女子前鳴指一下女子於是從定而出師云當時靈山會上者婆娘亦甚奇怪惜乎文殊不識來機青天白日被他迷惑而下方罔明雖則撥轉關捩未免泥裏傷刺若是山僧總不管他人定出定便與他驀面推倒非惟勦除窠臼要使瞿曇慚惶無地。

示眾舉孚上座因鼓山赴大王請雪峰門送回至法堂乃曰一隻聖箭直射九重城裏去也孚曰是伊未在峰曰渠是徹底人孚曰若不信待某甲去勘過遂趁至中路便問師兄向甚麼處去山曰九重城裏去孚曰忽遇三軍圍繞時如何山曰他家自有通霄路孚曰恁麼則離宮失殿去也山曰何處不稱尊孚拂袖便回峰問如何孚曰好隻聖箭中路折卻了也遂舉前話峰乃曰奴渠語在孚曰者老凍膿卻有鄉情在師云雪峰稱賞鼓山不必論量只如孚上座恁麼問鼓山恁麼答且道什麼處是他聖箭折處向者裏見得個儻分明便知孚上座只具殺人刀且無活人劍鼓山雖明出身路未解截波瀾點檢則二俱擔板各見一邊若到山僧門下合喫手中拄杖何故賞罰並行。

示眾舉香巖上樹若論此事如人上樹口啣樹枝腳不踏枝手不攀枝樹下忽有人問如何是祖師西來意不對他又違他所問若對他又喪身失命當恁麼時作麼生即得時有虎頭招上座出眾云樹上即不問未上樹時請和尚道香乃呵呵大笑師云嶮似懸崖毒如砒礪纔沾唇吻便爾喪身然香巖老漢固是施機善巧為什麼被虎頭一問只得呵呵大笑還委悉麼絲綸擲在煙波裏只為金鱗釣得歸。

示眾舉五祖演禪師三佛侍祖於一亭上夜話及歸燈已滅祖於暗中曰各人下一轉語佛鑑曰彩鳳舞丹霄佛眼曰鍊蛇橫古路佛果曰看腳下祖曰滅吾宗者克勤耳師云五祖老漢不妨是箇當路大蟲隨處張牙距爪爭奈三子頭角崢嶸各展風規然就中卻被箇返擲獅子攔腳一咬直至如今未得轉身。

示眾師云眾兄弟須向本參上親見一番出言吐氣自然如龍得水似虎逢山不須風雷遍地波瀾山僧為諸人發揮去也遂以拄杖旋風打散。

結制示眾師云寶劍揮空誑謔青天鍊蛇攔路平地賺人更欲曲垂巧喻何異淨眼添沙山僧卻不與麼舉拄杖云祇將者箇當陽直指汝等諸人敢道不見復卓拄杖云圓通大震忽爾喧騰汝等諸人敢道不聞見聞既爾分明者箇元非他物所謂處處真處處真塵塵盡是本來人真實說時聲不見正體堂堂沒卻身既是真實說為甚麼聲不見既是正體堂堂為甚麼沒卻身若向者裏會得未入爐鞴早已翻身未動鉗錘亦自光輝其或未然山僧且歸方丈待汝等來通箇消息。

靈機觀禪師語錄卷一

機緣

師在金粟侍者寮因費老和尚問眾紫羅帳裏撒珍珠意旨如何眾下語不恰師云請和尚炤顧兩片皮尚云汝又作麼生師云行觀歸臥去也時空巖禪師舉似天水禪師今晚公案惟機兄卻契老漢意水云也須問過師適至水云今晚兄答老漢是什麼語師便掌云還不知那水云也須問過。

一日師在方丈前鏟艸天水禪師問古人道法堂前艸深一丈為甚鏟卻師云恐兄無下腳處水回首指云艸漫漫地師云果然沒殺。

一日侍老和尚次尚問大脩行人未審得何果報師云拖犁拽耙尚云大造業人得何果報師云端坐受供養尚云爭奈以善為惡以惡為善師云和尚自生分別尚云如何是汝不分別底師云合取口尚休去一日尚問如何是先炤後用師云把火捉賊如何是先用後炤師云驀頭拶看如何是炤用同時師云禍不單行如何是炤用不同時師云鬧市裏打坐。

一日尚口占云眾生有病諸佛有病諸佛有病露柱有病未審露柱犯底是甚麼病師云鍼筍不入底尚云還有轉身處麼師與一推便出。

一日尚睡起師適至尚云方纔作得一夢甚生奇特夢見靈機要做善知識甚急師云和尚莫誣謗人尚云汝幾時得惺那師云老漢猶寐語在尚微笑。

一日因議論某禪師謬答人偷心未死偷心已死話尚顧師云設有人問汝如何是偷心未死師云和尚問處不實如何是偷心已死師云露也露也。師在金粟因孝廉周君謨居士相別問云保社源流已領教過還別有著作麼師豎拳云只有者箇士擬議師驀口一掌士搖手云者些當不得師云將謂別有那士無語時孤扣書記在傍云今日居士納敗闕士云同坑無異士師云陷殺居士了也士復無語。

歲荒師與唐琪園居士遊硤石仙人洞遍踏屍骸竟無覓處遂歸士謂師云今日仙人洞雖不見卻向鬼窟裏走一遭師云居士幾時得出頭來士云大家在者裏師與士驀胸一拳士乃笑。

一日師與唐居士路次遇一童子引至仙人洞洞上有臺師先躍身而上見士躡足徬徨師云居士須向者裏懸崖撒手始得士以手揖云請先師微笑云又要拖帶在。

一日普請種菜次偶傍僧話及應時及節事唐居士遽問如何是應時及節一句師云卻值種菜士云恁麼則根深蒂固去也師云須是恁麼始得。

雲表法師拜別師云再住幾日去表云已飽觀了師云還有觀不及處麼表云且待後來師云要見便見說甚後來表云不能得搆師云自生退屈。

師問素慥正法眼藏既向瞎驢邊滅卻將甚麼傳持慥豎拳師云我不識者是甚麼慥云三世諸佛也不識師云不識底是甚麼慥便喝師云者一喝落在甚麼慥擬議師直打出。

則峰問雲門餅趙州茶撥擲一邊無米飯請師拈出師云塞卻你喉嚨峰云百雜碎了也師云還我碎底來峰一喝師不肯又一日參次峰侍立師云塞卻你喉嚨你作麼生峰出禮拜謝和尚慈悲某甲一生受用不盡師云你爭生受用峰打師一掌拂袖便出師趕至門外打一掌云未信道在。

杭州居士同本境數文學入寺茶次師問老居士何處士云仁和士指諸文學云者數位俱是楊墳底老虎師云難得居士敢與同伴士云不入虎穴焉得虎子師云須知者裏是陷虎坑士相顧愕然而去。

僧問萬法歸一一歸何處師云老鼠鑽地洞僧云意旨如何師云七穿八穴。

師問泊如汝在金粟打七有甚麼得力處麼如云一切現成師驀伸手云拈出現成底來與我看如無語師云又不現成了如云一念回機便同本得師云如何是汝本得一句如豎拳師云死了燒了又作麼生如起身繞三匝師云不用打之遶向上道將來如云鼻孔大頭垂師云者是娘生已前底娘生已後底如擬議師將茶驀面潑。

如海禪者呈偈云也不讚也不罵有耳如聾有口如啞萬古一青松蓋覆四天下師云我卻不恁麼如云和尚作麼生師云讚則任讚罵則任罵有耳不聾有口不啞白棒頭邊解轉身孤風凜凜燦天下。

師問雪溪維那世尊拈花迦葉為甚麼微笑溪云南山起雲北山下雨師云將甚麼喚作正法眼藏溪豎拳師云不得喚作拳頭又作麼生溪便喝師云喝後響溪云禮拜和尚去也師休去。

僧問國師三喚侍者意旨如何師驀喚巡炤僧無語師便打進云便恁麼會時如何師云還我端的來進云蒼天蒼天師云何曾夢見。

師問心調心猿意馬日夜奔忙汝作麼生調調面熱師掌云狂性未歇。

天昂問世尊初生天上天下惟我獨尊為甚卻被雲門打殺師云強人慣奪強人手昂云雲門具何眼目敢行此令師云一棒打殺與狗子喫昂云後代兒孫普天匝地還有與他出氣者麼師便驀胸推出。

超質侍次師云莫被那人惑亂質云恁他風浪起只是不開船師云汝憑何伎倆便與麼道質云男兒自有通天志便出師云看腳下。

師問星幢今朝觀音誕日將甚慶誕幢云將此身心奉塵刹師云用許多身心作麼幢云和尚又作麼生師云不在盃盤上清茶也醉人。

居士問既是演武場因甚干戈不動師云少見敵手僧問既是無上醫王因甚有病師云知心者少。

密如初入侍寮禮拜師問鳥窠吹布毛侍者悟去我無布毛吹汝又作麼生密云今日為侍者師云權且安汝單。

師因肚痛只端為師揉肚驀喚云只端端應諾師云我喚只端汝為甚答應端云和尚喚某甲應師云不是不是端云將謂有第二箇那師云作麼生是第一箇端云揉肚底師云揉肚底不是只端端云猶隔一重在師云如何道得透徹句端云揉出肚腸來師云猶隔一重在。

師問只端天不能蓋地不能載是箇甚麼端一喝師云汝還知者一喝漏逗麼端無語師便喝端云某甲喝和尚亦喝端的在甚處師急喚云道道端擬議師便推出。

歲旱師垂問既是資福合應受用因甚累及諸人忍飢不暇眾答不恰至印云不是苦心人不知。

脩六問弟子蒙師指示會得作用邊事但自己本分事實未透脫師云汝試摸取眉毛還在麼六云分明現成只是未免有疑師云古人道開口成雙擗揚眉落二三擬心動念卻又不是汝作麼生會六無語師打云不得向鬼窟裏作活計六又無語師良久云還會麼六云會箇甚麼師云禮拜了向汝道六便禮拜師轉身大笑閉卻門六復推開門擬問師直打出。

社木問有眼底人看不見有口底人道不得和尚作麼生師云正要覓者箇人社禮拜師云會麼社云不會師呵呵大笑便行。

師客黃檗藏閣有僧問德山棒臨濟喝意旨如何師云就向德山棒臨濟喝處領略僧云和尚還有為人處也無師云又要別商量僧喝師便打云且道意旨如何僧又喝師咦一聲僧少頃呈偈云驀面清風過經閣德山臨濟處領略金毛獅子解翻騰踏透重關真快樂師云如何是汝快樂境界僧舉起兩袖作舞而出師云少賣弄。

一晚眾侍立師舉五祖演和尚云譬如水牯牛過窗櫺頭角四蹄都過了因甚尾巴過不得諸兄弟作麼生會試道道看時唯觀禪客出眾云用窗櫺作麼師云尾巴擗進云喚什麼作尾巴師云正是汝疑底進云縱橫去也師以手作牽拽勢云還在者裏觀擬議師云何曾得縱橫觀便喝師云遲了八刻觀禮拜師呵呵大笑歸方丈。

僧驀豎拳問云喚作者箇則頭上安頭不喚作者箇猶落無記請問和尚畢竟喚作甚麼師云沒開交漢最可愁僧禮拜師云畢竟喚作甚麼僧復豎拳云爭奈者箇何便轉身師打一棒云未在。

問家破人亡時如何師云還我憑據來僧答不恰至晚落堂令眾下語皆不契次日琰石至室中云家破人亡覓一物了不可得和尚更索甚麼憑據師云若無憑據你者臭皮囊從何處來石禮拜云昨被和尚錐筍偶成一偈云全憑一箇赤拳頭打得須彌顛倒走大地群峰盡著忙虛空笑破半邊口師云只如有人笑你又作麼生石一喝師云未識笑在石努目云醜陋也不識師云是誰醜陋石拂袖便出師云大好識醜陋。

問如何是父母未生前底面目師云第二番來向你道僧進步云第二番來了也師云原是起先議師便打出。

問閑雲片片欲住未住碧水涓涓欲去未去未審資福以何拘繫師云截斷去住你作麼生出身僧云男兒若識自家珍隨處青黃總是春師云你即今是住是去僧云且禮一拜師劈脊打云切莫忘卻者一棒問一句截流萬機侵削請問和尚是那一句師舉拄杖云當陽直指識者知歸僧禮拜云恁麼則隨他去也師擲退云艸裏漢。

師問茹檠書記我適纔問殿主釋迦老子名什麼渠無對汝道名什麼檠云切忌頭上安頭師哂之。

心持入室禮拜師云是誰持云梅月師云是誰海月持云自叫還自應師云自叫還自應底端的是誰持走出師云將謂有兩箇。

師問薦穀堂中事作麼生進云深領和尚者一問師云如何是深領底意進云有意氣時添意氣不風流處也風流師云大似喫飯咬著砂。

師問僧人人本具箇箇不無本具箇什麼不無箇什麼僧豎起一拳云且道是有是無師云死了燒了擗僧便喝師云死了燒了者一喝落在何處僧云遍界不曾藏師休去。

問三聖云一千五百人善知識話頭也不識且道雪峰過在甚麼處師云不用念言語須憑正眼開僧禮拜云今日謝恩有分師云作麼生是你謝恩底意僧云親見和尚師云辜負我不少僧喝師便打僧擬議師云果然。

典座問舉一不得舉二放過一著落在第二意旨如何師云要向汝道恐汝不信進云只如人從天台來卻往徑山去又作麼生師云分付典座自安排進云六六三十六師云如何是最初一著底座震威一喝石劈頭便打師又問一僧水牯牛作麼生僧云早已收入欄師與一掌云何不道出入自由。殷道人為僧師問鬚髮已除僧相現前如何是超佛越祖底意殷罔措師便喝殷禮拜師劈脊一拳云睡眠未開徒勞話會。

師一日喚悅眾語浪問云堂中有幾多禪師浪云連公務三十位師云幾箇惺惺幾箇瞌睡進云珊瑚枝枝撐著月師云南山起雲為甚麼北山下雨進云大家在者裏師便與一掌云打濕眉毛師舉前話問絜玄侍者云設問著你堂中幾多禪師你作麼生答進云瞞不得和尚師云瞞不得你底是惺惺是瞌睡進云一任分別師云作麼生是你不分別底者便喝師便將扇敲板壁三下。

師問法立書記馬祖一喝意旨如何立云覲面全提師云百丈三日耳聾又作麼生立云腦後一輪紅師打云是賞是罰立便禮拜師云何曾識好惡。

師問茹檠首座德山道我宗無語句亦無一法與人作麼生會座云大小德山舌頭拖地師云汝向甚麼處見德山座便喝師便打。

師問燦衲侍者達磨來東土作甚麼衲云西方日出卯師云意旨如何衲云何人眼不開師云也須端的始得衲珍重便出。

一日師喚祖量侍者云山僧要覓箇悟底人與他證據量云他從來不迷悟箇甚麼師云作麼生是不迷底意量云一堂風冷澹千古意分明師云分明一句又作麼生量云目前是和尚此間是學人師云目前無上座此間無山

僧又如何是云清風拂明月師云者猶是境邊事量云和尚作境會那師云你不作境會作麼生會量與師一掌師便打量禮拜云太親切師以杖擲退。

嵩菴藏主應雲溪請辭行師拈拂云與汝表信菴云本色住山人要者箇作甚麼師云若無者箇將甚麼傳持菴撲師膝云恁麼則知恩報恩去也便禮拜師劈脊一拳云記取記取。

僧問靈雲見桃花云自從一見桃花後直至如今更不疑如何是不疑底師云鼻孔大頭垂進云玄沙道諦當甚諦當敢保老兄未徹在那裏是未徹處師云逆浪取金鱗。

師與非眼上座喫茶次師云惠州離曹溪多少路眼云八百里師云曾到大庾嶺麼眼云到師云當時明上座因甚提不起眼擬議師云鷓鴣子過新羅。師問二函撥艸瞻風只圖見性你性在甚處函一喝師云此一喝未有端的在函云將謂別有那師云作麼生是你不別有的函無語師打云將謂別有那。

師問鍊山書記如何是你胸襟句子山云甕裏何曾走卻鰲師云你試打破甕來山云出頭天外看誰是我般人師起身打一拄杖歸方丈山隨後掌云已是喪身失命了也師復轉身打一拄杖山禮拜。

明心問古人道七日不悟截去老僧頭一七已完還有悟底麼師云有心云箇中有幾人師便打心禮拜云謝和尚證明師云證明且置那裏是你悟處心云千聖也不識師又打心喝一喝師復打。

一日師問祖量侍者云靈雲見桃花悟箇甚麼量云鼻孔大頭垂師云玄沙不肯又作麼生量云誰人知此意令我憶玄沙師云畢竟是何意旨量彈指一下師云山僧不會者般消息量云作家宗師天然猶在師云毒氣逼人量云某甲罪過便禮拜師休去。

師問擇元世尊拈花意旨如何擇云觀體賣風流師云迦葉微笑又作麼生擇云忍俊不禁師云只如不拈花不微笑又如何擇云逢人且說三分話未可全拋一片心師云道得一半。

僧問如何是父母未生前本來面目師云破米篩。

師問萬法是心光諸緣皆性曉本無迷悟人只要今日了既本無迷悟又要了箇甚麼祖量侍者云從前汗馬無人識祇要重論蓋代功師云更須脫盔卸甲。

師問幻觀侍者老僧末後有所分付你還承當得麼者云承當得師云你作麼生承當者驀豎拳云撐天拄地師云阿誰不願。

僧問學人不知安身立命處請師決疑師云大眾看你敗闕僧擬議師便打。

僧問虛空粉碎大地平沉和尚還有為人處麼師云有僧云作麼生是和尚為人處師云待虛空粉碎大地平沉時向汝道僧云粉碎久矣師云賊證在甚處僧喝師便打僧擬拜師以杖擲退云脫空妄語漢。

師問雪覆千山因甚孤峰不白僧云突出難辨師云既然突出為甚卻難辨僧云某甲亦不知師云不知如何會僧展手云看看師以拄杖擲退。

僧問臨濟問黃檗的的大意三度被打某甲問和尚的的大意又作麼生師云有棒不打你僧云為甚不打師云只為你不識的的大意僧禮拜云知恩者少負恩者多師打云就是你一箇。

僧問香嚴在百丈會下問一答十問十答百為甚到為山便開口不得師云只為箇著他痛處僧禮拜師云會了禮拜不會禮拜僧云不會師劈脊便棒。

僧問大死的人卻活時如何師云截斷舌頭看僧無語師云古人道不許夜行投明須到與山僧道底還有優劣也無僧擬議師云切忌停囚長智。

僧問大冶紅爐烹佛祖還有不受烹者麼師云有僧云請出相見師云站過一邊僧禮拜師云墮也墮也。

僧問如何是父母未生前本來面目師云古廟裏香爐又僧問如何是父母未生前本來面目師云適纔向那僧道汝作麼生會僧云不會請和尚方便師云無人覷得破。

僧問一口吸盡西江水意旨如何師云還有船隻往來麼僧云有師云既有船隻往來如何吸得盡僧擬議師便打。

僧問牛頭未見四祖時如何師云蹄角甚分明見後又如何師云疲倦懶翻身。

僧問如何是學人父母未生前本來面目師以杖指云穿卻鼻孔僧罔措師便打。

僧問無夢無想主人公在甚麼處師云五里一牌又一居士問如何是弟子本分事師云十里一鋪。

僧問萬法歸一一歸何處師云一溪流水碧僧云學人不會請師再示師云千山起白雲。

僧問興化打克賓意旨如何師云翻轉面皮看僧罔措師便打。

僧問既是法身無相法眼無瑕因甚有丈六金身師云你又著相僧擬議師云一莖艸蓋卻。

僧問打死某甲也不會和尚別有方便也無師云有僧云有何方便師便打。

僧問魯祖面壁意旨如何師云思量不到僧云南泉恁麼道又如何師云驢年去僧云知音不在頻頻舉師云未必未必。

僧問見見之時見非是見見猶離見見不能及如何是見不及處師云拖來拽去甚分明進云與麼則看破了也師云如何是汝看破處進云夾路桃花風雨後馬蹄何處避殘紅師云一場狼藉。

僧問文殊是七佛之師因甚出女子定不得師云有本多失利罔明是初地菩薩因甚出得女子定師云無錢使萬千。

僧問如何是父母未生前本來面目師云你道赭山鹽多少舫僧無語師打云無地頭漢。

僧問有句無句如藤倚樹樹倒藤枯句歸何處師云葛藤滿地。

僧問狗子為甚無佛性師云逢人便咬殺進云為甚又道有師云見主便搖尾。

僧問不見一法是為大過且道是甚麼法師云是你疑的法僧禮拜云謝師指示師云明得什麼邊事僧云知音不必頻頻舉達者方知暗裏驚師云猶是靴裏動指師復云逐夜與諸兄弟東挑西撥不曾有箇咬豬狗底漢子還有咬豬狗底漢子麼眾無語師以杖旋風打散僧向師背後抱住云作麼作麼師便打僧便走師復喚問云正當恁麼時還容得你作麼作麼僧禮拜云是學人心癩師云須是還我一轉語若道不得打斷你驢腰。

僧問為山道向山前檀越家作頭水牯牛若喚作為山卻是水牯牛若喚作水牯牛卻又是為山畢竟喚他作甚麼師捏僧鼻云是為山是牯牛。

僧問承和尚有言若是悟底人如龍得水學人到者裏進前無路退後無門時如何師打云快走快走進云謝師指示師云猶在死水裏。

副戎大翁魏居士呈偈學道無別旨無心便廓然巍巍大自在此外別無禪師云一句當天八萬門汝會麼進云我無一切心何用一切法師云滴水豈是大海進云一口吞盡師云莫是龐公麼士禮拜師哂之夜坐師垂問老瞿曇睹明星悟道且道悟箇甚麼眾無語師云幸然答不得免教惹禍端。

僧問鐘樓上念讚床腳下種菜是何意旨師云望空啟告。

僧問古鏡未磨時如何師云我見你見僧云磨後如何師云彼此不相識。

僧問如何是佛師云向你道不得僧擬議師打一棒云情知你承當不起。

僧問趙州無意旨如何師云當門震塗毒僧便喝師打云腦裂也不知。

僧問一火燒卻畢竟者箇在甚處師云山前驢喫艸。

僧問般若以何為體師豎拳云會麼僧云會師云你作麼生會僧云露也露也師云未露已前是何面目僧擬議師便掌復問侍者未露已前是何面目者云遍界不曾藏師笑云喫飯咬著砂。

僧問某甲因和尚棒下會得箇活句師云甚麼活句進云風吹殿角鈴兒響師云猶是隨境漂流。

僧問既是本有之事因甚描不成畫不就師打云會麼進云會得底因甚眉毛又在眼上師云眉毛若不在眼上又會箇甚麼僧禮拜師云敗也敗也。

師問僧世尊三昧因甚迦葉不知僧云金不博金師云迦葉三昧因甚世尊不知僧云水不洗水師云金不博金水不洗水相去多少僧云和尚分疏看師云你辨別眼何在僧無語師便打。

僧問進一步則腳下艸深三尺退一步則平地上死人無數不進不退猶落今時請問和尚如何是透脫一句師云圓頭自領去僧拜師云更要覓透脫在僧起身云拖泥帶水去也師打云何曾得透脫。

僧問毫釐繫念三途業因直饒一念不生猶是死水裏浸殺請問和尚如何得出窠臼去師云山僧不敢動著汝僧云因甚不敢動著師云要汝自翻身僧云翻身去也師打云大須仔細。

僧問猛虎擒羊如何救得活師厲聲云者死畜生僧便出師云活也活也。

僧問古人云有句無句如藤倚樹如何是有句師云露柱立庭前進云如何是無句師云水上浮漚任去來進云樹倒藤枯句歸何處師云你還識問話底麼進云更不覓知音師云自倒自起漢。

僧問學人捉倒家賊請師判斷師云早已據款結案進云且道此人還有功也無師云又作別商量進云從前汗馬無人識師云剖胸露膽幾人知。

僧問昏沉散亂不得自由師劈面掌云惺惺著進云領略不來師云青天白日瞌睡作麼僧喜躍而出。

僧問能為萬象主不逐四時凋春至百花問秋來黃葉飄如何是不凋底意師云赤骨露堂堂僧禮拜師打云還會麼僧云赤骨露堂堂師云學我來也僧又拜師云墮也墮也。

僧問內不放出外不放入以何為界師云內不放出外不放入我道無可為界進云如何得翻身去師云須是上座始得僧便喝師便打問不在內不在外不在中間畢竟在甚麼處師云覲面卻相逢問趙州訪二菴主主一般豎拳因甚麼肯一不肯一師云分身兩處看僧便拜云能殺能活能縱能奪師云語不離窠墮在葛藤問走盡千山與萬山趙州柏子悟由難師云覲面赤條條。

僧問未結制以前人人氣宇如王打七以後箇箇為甚冰消瓦解師云爭得到者裏進云忽有箇冷灰豆爆底人到來如何接待師云但向他冰消瓦解處看取僧云恁麼則有意氣時添意氣不風流處也風流師云風流意氣從甚處得來僧喝師便打問一塵纔起大地全收祇如一塵未起大地收箇甚麼師云覲面露堂堂師拈杖示僧云山僧喚作拄杖你喚作甚麼僧豎指師打云且道是同是別僧一喝師云未夢見在。

僧問盡大地是學人自己和尚向甚麼處安身立命師云你還知落處麼僧禮拜師云會了拜不會了拜僧擬議師便打云空開許大口乃曰麻三觔也是者箇面目乾矢橛也是者箇面目殿裏底也是者箇面目既是者箇面目諸人為甚不會遂以拄杖打散。

僧問馬祖畫一圓相封送徑山欽師向圓相中下一點意旨如何師云你又落在圈套裏僧擬議師打云急須出頭來進云學人也有一轉語窮坑填不滿師云從上尊宿各有悟門大須仔細咬嚼切忌攀扯葛藤諸人還得悟門也未出來通消息看一僧出云咬嚼也是爛葛藤師云如何是離卻葛藤一句進云學人到者裏開口不得師云既有口為甚麼開不得僧便禮拜師云雖然啞子喫黃連次日問趙州洗鉢孟話未審有指示無指示師云會取啞子喫黃連進云知心能幾人師云切忌自道問萬法歸一畢竟一歸何處師

捏住鼻子云一歸何處僧擬議師打一掌云會麼僧云不會師云不會底他時後日挑了去。

僧問今朝臘月三十日福嚴法道無消息請師指出箇中元令我一生大事畢師云你但睜開兩眼看進云此是學人分上事如何是和尚為人一句師劈頭便棒進云福嚴法道也只得一棒師云何曾夢見一棒來進云大眾證明師云痛癢也不知。

重塑先老和尚開光日僧問朕兆未分即不問神光點出意如何師云開眼便見進云恁麼則老和尚儼然猶在師云你分上作麼生進云大眾沾恩有地師打云者一棒少汝不得進云謝和尚指示師云未在。

僧問善財參妙高峰意旨如何師云你還見山僧麼進云別峰相見又作麼生師打云還不領會問文殊為七佛之師因甚出女子定不得師云張公多喫酒進云罔明乃下方菩薩為甚卻出得女子定師云李老面皮紅。

僧問學人方纔親見本來面目師云恁麼則卻成兩箇。

僧問一切眾生皆有如來智慧德相只因妄想執著而不證得某甲妄想頓除作麼生證師云青天白日又說夢進云唯此一事實餘二則非真師云作麼生是你底真僧一喝師便棒。

僧問南泉斬貓意旨如何師云一刀兩段進云此是古人道底如何是和尚為人處師云你道古人鼻孔與山僧鼻孔還分別得麼進云一串穿卻師便打進云祇如趙州頂艸鞋又作麼生師云也是賊過後張弓僧展兩手師復打一棒。

僧問人人有箇影子因甚踏不著師云踏著即禍生進云杲日當空因甚被片雲遮卻師云切忌瞞昧問竹篋子學人放下了師云作麼生是放下底消息僧展兩手師云猶要抖搜在。

僧問祖祖相傳即不問通身慶快時如何師云將何憑據僧豎左拳師云一火燒卻時如何僧豎右拳師云拈一放一有甚了期。

僧問芭蕉示眾云你有拄杖子與你拄杖子既有作麼生與師云富贈黃金進云你無拄杖子奪你拄杖子既無又如何奪師云貧思索債。

僧問百年三萬六千朝翻覆原來是者漢祇如枕头落地又悟箇甚麼師打一棒云打破棺材見活人。

僧問人人有箇本來面目學人因甚不識師云岸上蹄踏蹄水裏嘴對嘴。

僧問南泉斬貓意旨如何師云刀下看取進云趙州戴艸鞋又作麼生師云證父攘羊。

師法體違和魏大翁副戎入山問安師把住云汝道山僧在甚處魏云蓋天蓋地師付素珠云昔時盧行者今日魏居士士云又來塗污師云分明記取無忘此山。

擇元問四大本空五蘊非有向甚處與和尚相見師云此問復何來擇云與麼則地獄天堂留不住鑊湯爐炭獨稱尊師云你向爐炭中拈出些子看擇

云意氣不從天地得男兒行處火消冰師打云且道是賞你罰你擇云謝師證明師又打。

問萬法歸一一歸何處師云飯須隨眾喫屎急自家屙。

居士問和尚髮長為何不剃師云從來不欠少士云僧俗也須分明師云誰與汝論僧論俗士以手指師師微笑云又道僧俗不分明。

垂問五則

未過楊墳渡撩起便行猶較些子既過渡來合喫多少棒。

觀音橋許汝進步胡張三聳身欲過黑李四倒拽轉來是何道理。

鉢盂案口門向天人人知道翔鳳山未肯點頭意在於何。

諸方說法攢花簇錦者裏說法運水搬柴你道閻羅大王聞時作何判斷。

問禪不會玄妙落筆全無孔丘既無如是奇特親近他做甚麼。

靈機觀禪師語錄卷二

勘辨

僧同安參見問云砥柱聖凡關捩子黑風吹倒意如何師云黑風吹倒意如何且止如何是聖凡關捩子安進步作抱勢師便與拓開云推倒了也安一喝師便掌云者掌又作麼生安乃打傍僧云者掌該是你喫師云捉敗了也安亦云捉敗了也師云將謂將謂只端參次云素手見和尚師云本來無一物說甚素手端云鼓粥飯氣作麼師云汝又來吐酸端云也要和尚知師云氣息不堪端云蒼天蒼天師云真箇受屈。

璨衲參師問你是那裏人衲云興化師云壺公山為甚生在興化衲云為伊不生別處師云端端的在甚處衲便喝師云我者裏一喝不作一喝用汝又作麼生衲云特來禮拜和尚師云請坐喫茶。

僧參師問那裏來僧云德清師云到者裏作甚麼僧云要到杭州去師云不許借路經過僧無語師問眾既不許借路經過者僧為甚又到者裏法立書記云官不容鍼私通車馬師云露柱為甚麼懷胎立云和尚莫瞞人好師云作麼是你不瞞底立拂袖便行。

僧參師問你從那裏來僧云曹溪師云還識六祖大師面目麼僧云不識師云近前來向汝道僧近前師云但向不識處會取僧擬議師打一扇云山僧今日罪過。

僧參師問昨日禪堂前與汝相見了也恁麼會去多少省力僧無語師云念汝遠來且坐喫茶。

二僧參問賓主相逢即不問鍼芥相投事若何師豎一指云會麼僧云少者三拜不得便作禮師云特地一場愁乃問第二位鍼芥相投你作麼生會僧云今日親禮和尚師云未禮已前又作麼生僧擬議乃喝師云遲了八刻。僧參一物不將來時如何師云喚什麼作一物僧便喝師云一物不將來又喝箇甚麼僧無語師打云切忌傷鋒犯手。

僧參自敘在五祖住五載師徵云莫有所得麼僧云無所得師云既無所得莫蹉過麼僧云饑來喫飯困來眠有甚蹉過師云你道閻羅老子來時又作麼生僧無語師驀頭打一扇云大須仔細。

僧參師問仙鄉那裏僧云福建師云幾時過關來僧云兩三載矣師云仙霞嶺是甚麼人看守僧擬拜師轉身云到即不點。

僧參師問撥艸瞻風只圖見性上座性在甚處僧云有水皆含月無山不帶雲師云此猶是尋常見解作麼生是出格句僧禮拜云學人今日親見和尚師云你道山僧意如何僧喝師云何曾夢見。

僧參問云從上諸聖與人抽釘拔楔和尚將何為人師云教汝生不得死不得僧云佛祖一齊來又作麼生師云都教立在腳下僧禮拜師打云納敗不少。

僧參問云千里求師只圖見性未審性作麼生見師卓拄杖云會麼僧云即此便是麼師云汝道是箇什麼僧佇思師以杖擲退云夢裏何曾惺得來。僧參問云臨濟喝德山棒是古人為人處未審資福將何為人師豎起拄杖僧禮拜云同坑無異土師打云陷殺者師僧。

僧參師問仙鄉那裏僧云江西師云還記得未生前消息麼僧舉起茶鍾師云者箇是已生底如何是未生底僧云和尚為甚打作兩橛師云作麼生是上座一橛底意僧無語師笑云且請茶。

僧參師云仙鄉那裏僧云湖廣師云父母未生前在甚處僧云學人不曾禪師云汝為甚喚作禪僧無語師云入地獄如箭射。

報恩僧參師問如何是報恩得力句僧云沒有得力師云恁麼則蹉過了也僧云不蹉過師云如何是汝不蹉底僧無語師云大好不蹉。

僧參師云汝來也僧罔措師云將謂家中人元來門外漢。

僧參問云機不離位墮在毒海請師一接師云且喜到者裏僧側耳作聽勢師掌云裝聾作啞作麼僧云大眾記取此語師叱云他時後日叫屈去在。

僧參師問三人同行必有一智阿那箇是智僧云今日親見和尚師云親見山僧且止如何是上座底智僧便喝師云者一喝山僧卻不會僧云某甲到者裏也不會師云山僧也不會上座也不會是箇甚麼意旨僧又喝師云好與三十拄杖僧禮拜云某甲今日小出大遇師云請坐喫茶。

僧參纔開口師驀胸擒住云汝擬伸問箇甚麼僧面熱師便推出。

僧參問云如何是得力句師云挑不起師卻問如何是你得力句僧便喝師云得力句不在喝上僧云在甚處師云禮拜了向汝道僧禮拜師驀頭一踏。

僧參師問仙鄉那裏僧云江寧師云來者裏作甚麼進云特來親覲和尚師云山僧眉毛與汝眉毛撕結汝還有受用也無僧無語師云猶隔大千在便起身入臥室。

僧參問父母未生前向甚處相見師以手打壁示之僧舉頭師便喝僧云相見後又作麼生師云切忌切忌。

僧愧菴參展坐具問云在麼在麼師云早已刺腦入膠盆進云莫不是者箇麼師云你將謂別有那進云不是心不是佛不是物是箇甚麼師云又落第二頭僧擬開口師便打僧云和尚莫要亂打師又打僧扭師拄杖師直打出云亂統禪和師因見倔強故當面錄出以示大眾。

僧參師云從那裏來僧云瓶窯來師云曾帶得瓶來麼僧云帶得來師云試呈似山僧看僧無語師云可惜有瓶無口。

僧參師云我有一轉語問你天目山高多少僧云從來無蓋覆師云因甚在山僧腳下僧云特來禮拜和尚師云自甘埋沒。

僧參師云聞汝從江西來麼僧云是師云曾帶得甚麼來僧呈坐具師云依稀越國彷彿揚州僧一喝師云祇如一喝不作一喝用又作麼生僧云禮拜和尚師便打云納敗不少。

僧參問自遠趨風請師一接師便掌云會麼進云棒喝交馳諸方亦爾資福宗乘如何舉唱師云汝還會棒喝落處也未僧一喝師便打進云此猶是棒喝邊事師又打云情知你盡力跳不出僧又喝師云祇如一喝不作一喝用又作麼生僧又喝師拈拄杖趁打云亂喝作麼僧禮拜師云艸賊大敗僧起身侍立次師問幾時到者裏僧云清早特來求單師云向在何處住僧云福嚴師云既在福嚴又來求單作麼僧無語師便轉身云將謂將謂僧云和尚不得向者裏推托師云何曾夢見山僧來僧云恁麼去也師叱云者弄泥團漢。

僧參師問仙鄉那裏僧云福建師云那一府僧云泉州師云東西兩塔立虛空明甚麼邊事僧云今日卻好到資福師云未到資福已前意作麼生僧云和尚還要第二杓師云甚麼說話又是途路邊事僧云和尚自生分別師云如何是上座不分別聲僧便喝師云舌頭拖地了僧云今日不著便師呵呵笑云自知較一半。

僧參送鞋師問云達磨隻履西歸上座一隻從甚處得來僧云學人不曾師云腳跟托在和盤上夢眼不開最可憐僧擬議師以目視云將謂你是箇漢。

僧參師問本來無一物布帛果品從何而有僧頓足一下師云卻不是僧云和尚又作麼生師拈起布云會麼僧云供養和尚底師云轉不相當僧便拜師疾入臥室。

僧參師問眠房錢即不問艸鞋錢還也未僧云步步踏著師云虛生浪死漢又問第二位你作麼生僧云初參師云參箇甚麼僧無語師云將謂你是行腳。

僧送圓師云你送我圓是何心行僧頓一足師云此箇是者裏底作麼生是麻城底僧云和尚將謂有兩箇鼻孔師云試向我出氣看僧無語師一喝僧又無語師云將謂將謂。

僧參師云未到者裏不妨疑著既到者裏冰消瓦解疑著則不問如何是冰消瓦解僧云謝和尚今日放參師云如何是你放參底端的僧拊掌兩下云有甚麼不端的師云猶涉兩三僧便禮拜師云刺腦入膠盆便是你一箇。有暫到僧撞入方丈禮拜起問學人不敢造次請師答話師厲聲云你為甚麼落在陷虎坑裏僧擬議師拈棒僧云何以見得師便打云死活也不知僧無語師連棒打出。

僧參師問從什麼處來僧云金粟師云康僧尊者手中金瓶重多少僧一喝師云者一喝未是金瓶邊事僧云和尚又作麼生師便打云借口喫飯漢。僧參師問甚麼時節奔馳不歇僧云雲從龍風從虎師云世尊三昧迦葉不知迦葉三昧世尊不知意旨如何僧云太平本是將軍致不許將軍見太平

師指云恁麼語話無立地處僧喝師亦喝。

僧參師問那裏來僧云福嚴師云福嚴還有為人處也無進云有師云如何是福嚴為人處進云今日親見和尚師云話頭也不顧僧禮拜師云艸裏漢。

僧參問西來祖意請師直指師云簷前喜鵲叫僧云不會師云耳聾自不聞。

早參

早參師云喚作竹篋則觸不喚作竹篋則背不得無語不得轉機此是大慧老人為蛇添足處資福則不然喚作竹篋不觸不喚作竹篋不背一任著語一任施機諸人還知落處麼眾佇思師以拄杖一時趁散早參問一念未生前請師答話師云也祇是箇川^藟苴問萬法如何歸一師云簷頭雨滴聲僧云者是萬法畢竟如何是一師打云劈頭來也乃云大眾適纔者僧問一念未生前請師答話山僧向他道也祇是箇川^藟苴若向者裏會得三世諸佛歷代祖師同一鼻孔出氣者裏會不得騎牛覓牛未有了日。

早參師問僧世尊初生意旨如何僧云蓋天蓋地師云雲門一棒打殺又作麼生僧云笑底笑哭底哭師云未在僧云和尚又作麼生師以扇頭便打僧云和尚扇某甲喫某甲扇教誰喫師又打云分付你了也僧與師一推云放過即不可師又打僧亂扭師扇師復連打呵斥云亂統何不向蓋天蓋地處露出咬豬狗底手腳直操到底便與山僧推倒坐椅大拳一頓豈不彼此痛快師見僧沉吟乃起身云穿楊箭與驚人句不是臨時學得來。

早參問婆子燒菴意旨如何師云赤體露精光進云祇如者僧又作麼生師云一點氣息也無問薰風自南來殿角生微涼意旨如何師云披襟慶快時無法可商量進云恁麼則逍遙自在去也師云非汝境界問雲收雨歇即不問一片晴空事若何師云幾時到者田地問言前薦得未是作家喝下承當猶成鈍置且道如何即是師云情知你無著落進云覲面相呈無向背一點當陽互古今師云如何是互古今底消息進云天長地久日月齊明師云猶是說道理。

早參師問僧世尊拈花意旨如何僧云為憐三尺子不惜兩莖眉師云迦葉微笑又作麼生僧云看破了也師云看破箇甚麼僧云手長衫袖短腳瘦艸鞋寬師云世尊不拈花迦葉不微笑又作麼生僧云伸腳元在縮腳裏師云未在。

早參問人人頂天立地箇箇鼻頭相似為甚多少人向者裏活埋師云你又作麼生進云將謂和尚別有長處師打云切忌被山僧活埋進云瞞卻大眾去也師云話頭亦不顧問喚作竹篋則觸不喚作竹篋則背畢竟喚作甚麼師云你但放下竹篋看僧擬議師便打問高峰大師云四句中有一句能殺能活能縱能奪且道是那一句請師指示師云突出眼睛看進云高峰即今

在什麼處師劈頭便棒僧一喝師遂以杖擲退乃云三世諸佛只道箇人人頂天立地歷代祖師只道得箇箇鼻頭相似活埋不活埋是諸人分上事與山僧有何交涉良久遂顧視左右云鈍置殺人。

早參眾侍立次師顧左右云彼此丈夫兒豈可無血氣眾無語師拈拄杖旋風打散拋拄杖於地便行。

早參問如何是無位真人師云覷面相逢進云如何是有位真人師打云棒打不回頭僧擬議師云者死真人堪作甚麼。

早參知藏巨範問正與麼時如何是和尚為人一句師驀面便掌云會麼進云恁麼則賊身已露師云捉敗也不知乃云眾兄弟好一則機緣還知落處麼且道賊身已露是山僧分上是知藏分上有道得底麼眾無語師便趁散。

早參師云父母未生前一則舊公案佛祖雖提起未曾有決斷資福老婆心為汝重判斷且道作麼生判斷以拄杖旋風打散。

早參問風吹不動雨打不溼如何是風吹不動師云因甚顛倒到者裏進云如何是雨打不溼師打云會取前言好師云佛未出世祖未西來家無白澤之圖必無如是妖怪佛既出世祖既西來干戈四起家賊作祟幸有木上座在手時時與他整頓切莫動著動著則打折你驢腰。

早參師云立雪齊腰斷臂安心猶是向外馳求將心與汝安覓心不可得也祇救得一半且道者一半又作麼生不辭向汝說祇恐罵阿爺。

早參師問竹叟你在堂中參甚麼話頭叟云竹篋子話頭師云竹篋子話是甚麼人道底叟無語師打趁出少頃師喚竹叟叟近前師云古人道喚作竹篋則觸不喚作竹篋則背不得轉機不得無語速道速道你道速道箇甚麼叟擬議師又打趁出叟回首師云枯骨頭上覓什麼汁。

早參師舉僧問曹山學人通身是病請師醫山云不醫僧云為甚麼不醫山云教汝求生不得求死不得令眾下語不契師代云知和尚奈何不得又云若不是某甲幾乎誤服藥頭。

早參問大通智勝佛十劫坐道場佛法不現前不得成佛道師云今日又被你鈍置復云山僧者一轉語有兩負門若人檢點得出許他親見大通智勝。

早參師問石航知藏世尊拈花意旨如何航云家醜外揚師云祇道得八分復云山僧三十六年前見天童先師翁頌云世尊拈花脫體風流迦葉微笑通身賣俏當時百萬人天祇見拈花微笑山僧彼時得箇入處自是諸人不咬嚼雖然從門入者不是家珍。

早參問世尊三昧迦葉不知因甚麼微笑師云情知你覷不破僧擬議師以杖擲退云鈍置殺人問三世諸佛不知有瞌睡作麼狸奴白牯卻知有不為分外請問和尚還有奇特事也無師云瞌睡作麼僧一喝師拈棒打出問但有言說都無實義既不假言說如何顯實義師良久云會麼進云恁麼則寂

寂無言說寥寥亙古今師云如何是亙古今底消息進云蓋天蓋地師打一棒云者一棒是賞你是罰你僧無語師云猶欠轉身。

早參兩敘立次師云昨夜燈籠鑽入露柱鼻孔裏去鼻孔打箇噴嚏吹出一隊瞎驢到者裏既到者裏又作麼生師良久云有屈無伸處抱頭哭蒼天。早參師云思量不到處分明祇者是信手拈來看猶隔萬重山直須恁麼會方透祖師關。

早參問一念不生全體現六根纔動被雲遮學人一念不生還有過也無師云有過進云過在甚麼處師云過在一念不生問上根人來如何施設師云山僧不施設進云中根人來如何相見師云山僧不相見進云下根人來如何接待師云山僧不接待進云和尚畢竟作麼生師云你道拳頭好巴掌好。

早參次師云便是者些兒有甚別奇特不識兩眉橫那會鼻子直。

早參師問眾曰燈籠露柱與你自己一箇兩箇一僧出云和尚莫打作兩橛師云作麼生是你一橛僧云禮拜和尚師云昭昭靈靈堪作甚麼又僧云一任分別師云作麼生是不分別底進云不妨疑著師曰圓圖吞棗又僧出默豎左指師云露柱擡僧默豎右指師云者般見解何曾夢見。

早參師默豎拄杖云眾兄弟面目分明賊證現在若不領會怎怪得山僧遂卓拄杖一下便行。

早參師問指奇維那云前日臨濟賓主句汝道箇獅子咬人韓盧逐塊大似喫飯咬著砂帶累山僧牙齒痛今日忍俊不禁為汝舉了又作麼生那云主則不賓賓則不主師云畢竟事又作麼生那云將謂和尚是臨濟兒孫師以扇打云須是恁麼始得晚參次師語那云清晨下語不恰試再轉一手眼看那云出群須是英靈漢敵勝還他獅子兒師云何不早恁麼道那擬議師打出。

早參問祖師心印狀似鍤牛之機如何似鍤牛之機師云劈頭來也僧云全體恁麼來全體恁麼住師云是誰分上僧云阿誰無分便禮拜師以拄杖卓僧背云記取記取師良久復云記取箇什麼遂擲杖云唯此一事實餘二則非真。

早參問若論此事眨上眉毛早已錯過了也且道錯過箇甚麼師打云會麼進云須知有不錯過者師云作麼生是不錯過底進云龍得水時添意氣虎逢山勢長威寧師云炤顧腳下始得乃云釋迦鼻孔達磨眼睛豎拄杖云杖頭突出覷面分明是箇甚麼卓拄杖云瞎。

早參師云昨晚者僧問在麼在麼山僧答他早已刺腦入膠盆眾兄弟向刺腦入膠盆下轉一語看若也道得恰好救得者僧有僧出云和尚昨晚打我同參頭顱打破今日要打和尚師云你還知痛癢麼進云將謂別有師打云者掠虛漢一僧云百雜碎師云自傷己命又僧云若不入水怎見長人師云見長人後又作麼生進云面目現在師云似則似是即未是進云和尚疑則別參師云是何語話一僧云不入虎穴焉得虎子師云未在進云今日捉敗

者老漢師云不顧自己又僧云當初只道茅長短燒了方知地不平師云腳跟未穩在。

元旦早參新年頭有佛法新年頭無佛法古人俱道了也康熙十三年一句子諸人還知落處麼卓拄杖云切忌辜負山僧。

早參問據虎頭收虎尾第一句下明宗旨如何是據虎頭師云山僧騎在你背上僧云如何是收虎尾師云死活也不知僧禮拜起一喝師云遲了八刻。

早參問無夢無想主人公在甚麼處師云看你頂天立地僧擬議師便打僧禮拜師云你作麼生會僧云和尚赤心片片師疾以杖擲退問分賓分主即不問赤鯉化龍事若何師云潑天潑地任縱橫僧擬議復一喝師便打僧禮拜云已生頭角去也師云遲了八刻良久師召僧僧應諾師云好不伶俐問萬法歸一一歸何處師云前是勸農橋後是天中山遂以掌擲口云不合為人注腳問七日以前把住也則瓦解冰消七日以後放行也則縱橫自在未審把住是放行是師云你自分別看進云竿木隨身逢場作戲師云鼻孔因甚在山僧手裏僧一喝師便打問萬法歸一一歸何處承師答云前是勸農橋後是天中山意旨如何師云你昨夜云青州布衫著得了也猶覓甚麼勸農橋天中山僧罔措師便打僧云看破了也師云作麼生是你看破處僧云推倒天中山截斷勸農橋師云未是你分上事僧一喝師云轉見不堪。

晚參

晚參師顧左右云汝者班驢漢堪作甚麼不見古人道一拳拳倒黃鶴樓一趯趯翻鸚鵡洲有意氣時添意氣不風流處也風流且道明甚麼邊事良久云出頭天外看誰是箇般人。

晚參問春光將過半萬物盡皆甦惟有兩莖眉依然眼上敷師云一火燒卻時兩莖眉在甚麼處僧云遍界不能藏師云此是學來底作麼生是汝胸襟獨得底句僧云露也露也師不肯一僧云伸腳只在縮腳裏師云如何是汝縮腳底意僧喝師打云亂喝乃云遍界不曾藏露也露也伸腳只在縮腳裏天下衲子十箇有五雙道得相似只是未明一火燒卻兩莖眉在甚麼處隱山禪人出眾禮拜云記得去年正月半今年又見點紅燈師云恁麼則被時節變換了也山無語師便打。

晚參舉古人云諸庄旱損吾總不憂但室中舉狗子無佛性話四五百眾未有一人明得是可為憂祇如狗子無佛性話作麼生明大家道道看至印云寶劍當頭截師云趙州意在甚麼處印云全身在裏許師良久顧左右云莫更有道得底麼眾無語師云觀上座為汝等道去也寶劍當頭截全身在裏許此語甚分明今日為君舉便歸方丈。

晚參眾不問話師云古人道我若問話管教老漢下座便立起身卓拄杖云果然難得其人行數步復顧左右云可惜許。

晚參問大地無寸土挑底是甚麼師打云會麼進云會師云作麼生會進云日日出普去挑底是者箇師云者箇是甚麼僧喝師打云喝後又作麼生進云簷前雨滴分明歷歷師云又被風吹別調中復卓拄杖云日日普請去挑底是者箇若識得者箇達磨來東土不敢動著二祖往西天不敢覷著為甚麼不敢動著動著即禍生。

晚參卓拄杖云出來道道看嵩菴云某甲有一句子未到資福早已呈似和尚師云山僧也早與汝相見菴云即今事作麼生師便打菴喝師云再喝喝看菴云和尚是甚麼心行師云識得汝。

晚參問殺父殺母佛前懺悔殺佛殺祖又作麼生師云刀子擡僧一喝師以杖擡退乃顧左右云眾兄弟還識刀子麼驀豎拄杖便起身至印隨後云我王庫內無如是刀師云切忌失卻。

晚參師舉古德云從上來事祇在而今如何是今日事還是坐立儼然是聽板過堂是虛知藏云和尚惜取眉毛好師云上座眉毛擡藏云某甲罪過師打云者一棒是賞你罰你藏云也不消得師云大須咬嚼。

晚參問獅子窟中獅子旃檀林裏旃檀法戰場中為甚麼不肯一人師打云一棒一喝進云出群須是英靈漢勝敵還他獅子兒師云因甚在山僧腳下覓進云千峰勢到嶽邊止萬派聲歸海上消師云炤顧沒頭水乃云眾兄弟菩提路闊解脫門開要去便去要來便來思量甚麼卓拄杖一下。

晚參師舉德山晚參不答話問話者三十棒翔鳳則不然問與不問總不打他何故好肉不敢剗瘡淨地豈堪塗污卓拄杖一下便行復回顧左右云土曠人稀相逢者少。

晚參師云五臺山上雲蒸飯佛殿階前狗尿天堪笑當年成現物至今話柄口頭傳。

晚參問大脩行人不落因果因什墮堊狐身師云張三仙人帽進云不昧因果因甚脫堊狐身師云李四道士冠進云恁麼則有利無利不離行市師云如何是你不離行市底消息僧喝一喝師便一棒良久師復云話許你答只是汝未曾在試再轉一語看進云翻手作雲覆手雨縱橫舒卷總由他師云未在又一僧出云苦瓜連根苦甜瓜徹蒂甜師云也未在又一僧云有智主人二俱不受師默然又一僧禮拜師復舉問之僧云不會師云不會是甕中鱉會是天邊鷄便行。

晚參問昔有僧問一婆子云臺山路向甚處去婆云驀直去僧便行婆云好箇師僧便恁麼去也意旨如何師云驀直去進云後來趙州去問又是甚麼心行師云驀直去進云臺山婆勘破了也什麼處是勘破處師云驀直去進云只如不涉途程一句又作麼生道師驀與一棒云叫休不肯休與我作冤讎進云恁麼則不許夜行投明須到師云且莫詐明頭便行。

晚參師云春日晴黃鶯鳴眼裏看耳裏聽聽聽看看甚分明此時若不翻身去長安路上摸壁行。

晚參問文殊出不得女子定為復是退己讓人為復是法爾如然師云恁麼見解何曾夢見文殊進云罔明出得女子定為復是神通妙用為復是抑人揚己師云恁麼見解何曾夢見罔明僧禮拜云大人作用果與尋常不同師噓云臭氣逼人復云要識文殊麼以拄杖拈向左邊云過者邊要識罔明麼以拄杖向右邊云過者邊要識瞿曇麼將拄杖橫起云會麼土曠人稀相逢者少。

晚參師云八字打開和盤托出鬼面神頭驢腮馬嘴覲面分明莫言不道卓拄杖便歸方丈。

晚參典座問有句無句如藤倚樹意旨如何師云案板上刀進云恁麼則今古應無墜分明在目前師云如何是目前底消息座便喝師與一掌云者一掌又作麼生座歸位師噓一聲。

晚參問疏山造壽塔若將三文錢與匠人大嶺為甚道和尚此生決不得塔師云只為三文錢進云若將兩文錢與匠人因甚道和尚與匠人共出一隻手師云舌頭華破了也進云若將一文錢與匠人因甚道累匠人眉鬚墮落師云你試自檢點看進云只如學人渾身徹骨又作麼生師云你道得塔不得塔進云覲面露堂堂師打云點破則不堪。

晚參問觀音妙智力能救世間苦有一人遍身紅爛臥在荊棘林中未審如何救得師云今日出頭來。

晚參問如何是生師云劈頭一棒腦門開進云如何是死師云翻身背後看進云如何是不生不死師云幸是可憐生。

晚參問傳大士法身句還許學人逐句問否師云離卻法身道一句來僧云道不出師云你真到道不出底田地那僧擬議師以杖擲退。

晚參問從苗辨地因語識人忽有箇無言語底出來和尚又作麼生師云你又開許多口作麼。

晚參問不是心不是物不是佛是箇甚麼師云道過了也僧無語師便打問以字不成八字不是畢竟是箇甚麼字師便展兩手僧無語師打云好不領略復云若論此事最條直絕覆藏也無玄妙亦無奇特豈不見方纔那僧問不是心不是物不是佛山僧答他道過了也且道是答他語是明古人意若有具眼者試出來點破看一僧出云老老大大為人下注腳師云也須點破始得又僧云不可頭上更安頭師云作麼生是頭上不安頭底僧云不是心不是物師云且道古人意作麼生僧擬議師便打僧云也是者箇道理問不是心不是物畢竟是箇甚麼師云向你道不是心不是物忽抗聲云又要覓箇甚麼問不是心不是物不是佛畢竟是箇甚麼師劈頭一棒僧無語師以杖擲退良久僧復云某甲本參看破了也師云作麼生是你看破底消息僧云大海無魚大地無塵師云此是古人底作麼生是胸襟流出底句僧喝師云未夢見在僧云和尚不得壓良為賤師云祇道你未夢見在問一口氣不來向甚麼處安身立命師云頂天立地赤條條。

晚參問兩問臺山路二句驀直去祖師恁麼舉勘破婆子意師云你又刺腦入膠盆僧擬議師以杖擲退云好翻身不翻身愁殺人師云當時六祖大師道非風動非旛動仁者心動山僧即不然以杖擊旛云急薦取。

晚參問山河大地從妄想而生妄想若滅山河大地是有是無師云會取妄想問彼此燒作一堆灰向什麼處相見師云許多狼藉僧禮拜師云畢竟向什麼處相見僧無語師便打。

晚參問有句無句如藤倚樹樹倒藤枯句歸何處如何是有句師便與一棒進云如何是無句師云你還知棒頭落處麼進云樹倒藤枯又作麼生師云又要倚傍山僧在進云畢竟句歸何處師云你是何處人僧禮拜師云不合與者僧打葛藤乃云眾兄弟山僧恁麼答話盡是老婆禪明眼衲僧覷破觀上座無容身之地幸得眼親手便遂卓拄杖云險。

晚參問丹霞燒木佛意旨如何師云一時烘熱鬧進云院主鬚眉墮落又作麼生師云帶累你問話來進云二句已蒙師指示年窮歲盡事如何師云彼此赤條條僧禮拜轉身師隨後棒云腦後猶欠一槌進云也是節外生枝師云切忌節外生枝會。

晚參問牛過窗櫺頭角四蹄都過了因甚尾巴過不得師云只為你太廉纖乃云古人見你不曾譬如牛過窗櫺頭角四蹄都過了因甚尾巴過不得要會頭角四蹄過得底麼福嚴門前天寬地闊要會尾巴過不得底麼便是諸人今日疑底。

晚參問風雨颯颯即不問錦鱗破浪事如何師劈頭打云喫得棒也未僧一喝便拜師云猶要點額在良久復云者僧問得亦是祇是不解破浪山僧為諸人點化去也遂拋卻拄杖歸方丈。

晚參問牛頭未見四祖為甚百鳥啣花獻師云門前水流東見後為甚百鳥不啣花師云灶底火無煙進云學人今日與和尚相見且道與古人相去多少師云要會便會休要穿鑿進云分明月在海花上看到梅花且已幽師云元來又恍惚問十方同聚會箇箇學無為此是選佛場心空及第歸請問和尚如何是及第歸師云要你自翻身問善才參德雲七日不相見為甚在別峰相見師笑云今日方覷面進云且道妙高峰與別峰相去多少師棒云你且喫棒看僧云依稀似曲纔堪聽又被風吹別調中師云也要捏著鼻孔始得進云和尚又作麼生師復棒云不信道。

靈機觀禪師語錄卷三

落堂師問眾云若是赤臉毒蛇開口便咬冤家債主出眾理論眾許久無語師云資福與麼人艸求人語未絕一僧突出拜云今晚堂中大有喪身失命師云汝道是甚麼人僧云和尚試檢點看師云汝看者略虛漢僧一喝師云此喝未有主在僧云和尚也不得壓良為賤師叱云只管亂道汝此見與日前有一僧初見我問他達磨不來東土二祖不往西天上座著艸鞋行腳明甚麼邊事僧云明破即不堪師徵云汝便明破也何妨僧云和尚不妨疑著乃云此僧自無立地不識話頭落處與汝今晚答話無二何故汝道今晚堂中大有喪身失命山僧問汝是甚麼人汝道和尚試檢點看與者明破即不堪相似又云和尚不妨疑著豈不是一隊亂統僧無語師復種種痛叱衲子沿習時解眼腦不清之弊復云參學若無真正眼腳頭常被艸鞋欺。落堂問萬里不挂片雲虛空突出一竅未審是觸是背師云背觸且置如何是虛空一竅僧擬議師便打復云適來者僧問萬里不挂片雲虛空突出一竅未審是觸是背山僧答他背觸且置如何是虛空一竅若識得者一竅三世諸佛也是者一竅歷代祖師也是者一竅天下老古錐也是者一竅山僧也是者一竅諸人也是者一竅動則雷轟電掣靜則海晏河清且道如何是者一竅眾無語師拋下拄杖便歸方丈落堂師云早間僧問喚作竹篋則觸不喚作竹篋則背畢竟喚作甚麼山僧向他道放下竹篋看既放下竹篋又看箇甚麼良久云趕得便回真漢子人間天上更無雙。

落堂僧問今宵完七大事已畢師遽徵云作麼生是大事已畢僧無對師令眾下語久之皆不契至印吹滅佛前燈師便歸方丈。

落堂師呈拄杖云有眼皆見卓拄杖云有耳咸聞向上一著子切忌囫圇吞。

除夕落堂問古人烹白牛分歲未審和尚將何分歲師云掀翻無底鉢粒米不曾餐進云恁麼則一堂風冷澹千古意分明師云如何是分明底意僧喝師便打復云昔人烹白牛分歲也是越分家風山僧看來者一頭牛阿誰欠少拈拄杖云若向者裏會得便見兩角撐天四蹄踏地拽斷鼻頭放甚臭屁遂擲下拄杖便出。

落堂師云團圞沒縫罅覲面峭巍巍覲透無生路翻身撒手歸且歸後一句作麼生道卻被白雲多漏泄青山箇箇笑眉開。

落堂問空劫已前無影樹撐天拄地赤條條師云山僧不敢動著你僧禮拜師云倒也倒也。

落堂居士問無影無蹤時如何師云露頭露面進云併卻咽喉唇吻時如何師云漏逗了也。

落堂問古人道我得天龍一指頭禪一生受用不盡未審作麼生用師云待你到恁麼田地便知端的進云恁麼則學人會了也師云你作麼生用僧豎一指師打云自討棒喫問臨濟問佛法大意黃檗賜棒還有奇特事也無師云若作奇特會入地獄如箭射進云恁麼則土上不加泥師云不是者邊消息進云如何是那邊消息師打云啐師云眾兄弟切莫思量思量轉見鈍置豈不見古人道寧使永劫受沉淪不向諸聖求解脫古人恁麼舉揚心肝五臟剖向諸人面前此時不會更待何時卓拄杖便行。

落堂師驀豎拄杖云大眾從主至死只是者箇疑箇甚麼喝一喝師便行。除夕落堂僧問古人烹露地白牛分歲未審和尚將什麼分歲師云幸得人情好飲水共知甜進云恁麼則學人霑恩去也師云如何是你霑恩處進云學人道不得師打云又道霑恩乃云眾兄弟觀上座只有者兩句子會得飲水知恩如不會卓拄杖厲聲云切忌妄想。

打七落堂師喫滾水次以水彈地云如龍得水似虎逢山解能如此平地波瀾箇中若有英靈漢免得山僧為指南還有恁麼人麼眾無對師以杖打散。

落堂問無夢無想無見無聞主人公在甚麼處師云鵲知風鳩知雨進云月落萬川處處皆圓且道主人公在甚麼處擗師打云自甘喫棒問描不成畫不就時如何師云露也露也乃卓拄杖云祇者是莫擬議更欲別思量又是從頭起。

落堂師云問也問了答也答了如何是胸襟流出的句一僧云打刀須是邠州鍬師云你道邠州鍬從那裏得來僧驀豎拳云從者裏得來師云何用邠州僧無語師云弄虛頭漢又僧云甕裏何曾走卻鰲師云知與麼何不與麼僧亦無語師云同坑無異土。

落堂問答畢復舉晚參問僧趙州因甚道狗子無佛性僧云看破了也山僧云看破在甚麼處僧云今日終七山僧云終七且止本分事作麼生僧一喝山僧云暗地自點頭據者僧恁麼答話雖有繩墨若是狗子無佛性猶欠會在且狗子無佛性話又作麼生會若也道得不枉今日終七若道不得山僧放出趙州狗子咬殺諸人去也遂以拄杖一時打散時九如隨後師回顧問狗子為甚麼無佛性九云學人不敢道師云為甚不敢道九云恐喫棒師便打九云果然師連棒趕趁九便走忽撞著露柱師云露柱撞倒了也。

落堂師云還有一撥便轉底衲僧麼出來通箇消息看如無山僧為諸人指箇捷徑本分一著不須別覓但向腳跟下一咬咬住睜開兩眼看者咬住底是箇甚麼到者裏直是上天無路入地無門便是諸人放身命底時節遂顧左右云眉毛咸卓豎埋沒好風光卓拄杖云參。

落堂舉翠巖道一夏為諸人東語西話看翠巖眉毛還在麼古德云作賊人心虛資福則不然一夏為諸人東說西說且喜眉毛還在大眾者裏合得甚麼語有道得底出來道看秦月云羞也不識石麟云請和尚歸方丈師云總

是見端的在忽有箇漢出來道某甲若道直令老漢無藏身處雖然如是山僧罪過。

落堂衲僧家發言吐氣須要應時及節作麼生是應時及節底句斬新條行新令拄杖突出來箇箇須乞命以拄杖一時打散。

落堂舉世尊三昧迦葉不知迦葉三昧世尊不知意旨如何眾下語不契師顧祖量侍者云你作麼生會者云某甲不會師云你是會了不會不會了不會者云不會不會師云祇者不會疑殺天下人。

落堂師以杖指祖像問眾者漢來東土作甚麼芥舟云不為別事師云畢竟為甚麼事舟拜云夜深天寒請和尚歸方丈師云我歸方丈千你甚麼事舟云和尚探頭太過師便起身出堂。

終七落堂僧問萬法歸一一歸何處師云簷前兩滴聲進云青州布衫意旨如何師以杖擲退云抖擻看問山河大地從妄想而生妄想若滅山河大地是有是無師云會取妄想。

源流頌

第一世南嶽讓禪師詣曹溪參六祖祖問甚處來師曰嵩山來祖曰什麼物恁麼來師無語遂經八載忽然有省乃白祖曰某甲有個會處祖曰作麼生會師曰說似一物即不中祖曰還假脩證否師曰脩證即不無染汙即不得祖曰祇此不染汙是諸佛之所護念汝既如是吾亦如是頌曰。

竿頭浪跡驀然翻突出常光腦後寒迴脫名模全灑落頓超物表絕遮欄。

第二世馬祖一禪師在衡嶽常習坐禪讓和尚知是法器來問曰坐禪圖作什麼師曰圖作佛讓乃取一磚於菴前石上磨師曰磨作什麼讓曰磨作鏡師曰磨磚豈得成鏡讓曰磨磚既不成鏡坐禪豈得作佛師曰如何即是讓曰如牛駕車車若不行打車即是打牛即是師無對讓示偈曰心地含諸種遇澤悉皆萌三昧華無相何壞復何成師蒙開悟心意豁然(頌曰)。

爛艸堆邊豈活埋鞭繩拽脫兩眸開腳頭自爾超方用獨奪威獰降禍胎。

第三世百丈海禪師參馬祖侍行次見一群羣鴨飛過祖曰是什麼師曰羣鴨子祖曰甚處去師曰飛過去也祖遂扭師鼻負痛失聲祖曰又道飛過去也師於言下有省次日祖陞堂眾纔集師出卷卻席祖便下座師隨至方丈祖曰我適來未曾說話汝為甚便卷卻席師曰昨日被和尚擲得鼻頭痛祖曰汝昨日向甚處留心師曰今日鼻頭又不痛也祖曰汝深明昨日事頌曰。

好肉遭錐不自瞞含冤負屈幾愁歡雖然殺活全機用末上鉗錘更禍端。

第四世黃檗運禪師參馬祖值祖遷化時百丈廬于塔傍師乃請問祖平日得力句丈舉再參因緣言老僧昔被馬大師一喝直得三日耳聾師聞舉不覺吐舌百丈曰子已後莫承嗣馬祖去麼師曰不然今日因師舉得見馬祖大機之用然且不識馬祖若嗣馬祖已後喪我兒孫丈曰如是如是見與師齊減師半得見過於師方堪傳授子甚有超師之見一日丈問甚處來師曰大雄山下採菌子來丈曰還見大虫麼師作虎聲丈拈斧作斫勢師打丈一搥丈吟吟而笑遂歸上堂曰大雄山下有一大虫汝等諸人也須好看百丈老人今日親遭一口頌曰。

蠱毒家門出異嘗驢頭馬嘴突然彰堂堂廓爾無差互直截單提不覆藏。

第五世臨濟玄禪師在黃檗會中時睦州為首座勉令問黃檗如何是佛法的大意檗便打如是三同三度被打遂辭檗參大愚愚問甚處來師曰黃檗愚曰黃檗有何言句師遂舉前話復云不知某甲有過無過愚曰黃檗恁麼老婆為汝徹困猶覓過在師於言下大悟云元來黃檗佛法無多子愚擲住曰者尿床鬼子適來道有過無過如今又道佛法無多子汝見個什麼道理速道速道師於愚肋下築三拳愚拓開曰汝師黃檗非干我事師回黃檗舉前話檗曰大愚老漢饒舌待來痛與一頓師曰說甚待來即今便打隨後一掌檗曰者風顛漢來者裏捋虎鬚師便喝檗曰侍者引者風顛漢參堂去頌曰。

過橋截斷橋來路得路便填路往程劍戟干戈俱撩卻專為赤手白拈精。

第六世興化獎禪師初為臨濟侍者後在三聖會裏嘗曰我向南方行腳一遭拄杖頭不曾撥著一個會佛法底人聖聞得問曰汝具個什麼眼便恁麼道師便喝聖曰須是汝始得後又到大覺為院主一日覺曰聞汝道向南方行腳一遭拄杖頭不曾撥著一個會佛法底人汝憑個什麼道理與麼道師喝覺便打師又喝覺又打來日從法堂過覺召院主我直下疑汝昨日者兩喝師復喝覺又打師再喝覺又打師曰某甲於三聖師兄處學得個賓主句總被師兄折倒了也願與某甲個安樂法門覺曰者瞎漢來者裏納敗闕脫下納衣痛與一頓師於言下薦得臨濟先師於黃檗處喫痛棒底道理開堂日拈香云此炷香本為三聖師兄三聖於我太孤本為大覺師兄大覺於我太賒不如供養臨濟先師頌曰。

龍宮虎穴試爪雄到底誰知伎倆窮伎倆窮兮恨莫徹翻思昔日瞎驢翁。

第七世南院顒禪師上堂云赤肉團上壁立千仞時有僧問赤肉團上壁立千仞豈不是和尚道師曰是僧便掀倒禪床師曰汝看者瞎驢亂作僧擬議師便打趁頌曰。

拶透紅爐鐵一團烘烘烈烈逼寰間引他出窟金毛子返擲當前吐氣難。

第八世風穴沼禪師參南院院問南方一棒作麼商量師曰作奇特商量師卻問和尚此問一棒作麼商量院拈拄杖曰棒下無生忍臨機不見師師於言下大徹玄旨李史君守郢州請師上堂云祖師心印狀似鐵牛之機去即印住住即印破祇如不去不住印即是不印即是時盧波長老出問某甲有鐵牛之機請師不捨印師曰慣錄鯨鯢澄巨浸卻嗟蛙步驟泥沙陂佇思師喝曰長老何不進語陂擬議師打一拂子曰還記得話頭麼試舉看陂擬開口師又打一拂子牧主曰信知佛法與王法一般師曰見何道理教主曰當斷不斷反招其亂師便下座頌曰。

禹門三級浪高遊截斷洪波得自繇嶮巖灘頭重插腳踏翻滄海玉輪浮。

第九世首山念禪師晚居風穴會中穴勉擔荷大法師曰願聞其要穴遂上堂舉世尊以青蓮目顧視大眾乃曰正當恁麼時且道說個什麼若道不說而說又是埋沒先聖且道說個什麼師乃拂袖下去穴擲拄杖歸方丈侍僧問曰念法華因甚不祇對和尚穴曰念法華會也次日與真園頭同上問訊穴曰作麼生是世尊不說說真曰鵲鳩樹頭鳴穴曰汝作許多癡福作麼何不體究言句又問師師曰動容揚古路不墮悄然機穴謂真曰何不看念法華下語頌曰。

閑門破戶要支撐爭奈兒孫忤逆行掉臂昂然歸去也迴超物外震家聲。

第十世汾陽昭禪師歷參知識七十一員後到首山問百丈卷席意旨如何山曰龍袖拂開全體現師曰師意如何山曰象王行處絕狐蹤師於言下大悟云萬古碧潭空界月再三撈攬始應知有問曰見何道理便爾自肯師曰正是我放身命處師頌三玄三要曰三玄三要事難分得意妄言道易親一句明明該萬象重陽九日菊花新頌曰。

山窮水盡未歸蹤狹路相逢始見窮覲面投機無個事赤身從此振宗風。

第十一世石霜圓禪師謁汾陽經二年未許入室每見必詬罵一日訴曰自至法席不蒙指示念歲月飄忽已事未明有失出家之利語未卒汾叱曰是惡知識敢裨販我怒舉杖逐之師擬伸救汾掩其口乃大悟曰是知臨濟道出嘗情師後室中插劍一口以艸鞋一雙水一盆置在劍邊每見人入室即曰看看有至劍邊擬議者師曰險喪身失命了也便喝出頌曰。

驢鳴狗吠聲聲鬧鐵眼銅睛亦斷腸客路思鄉眠不得抬眸忽覺已天光。

第十二世楊岐會禪師參慈明總院事每咨參明曰庫司事繁且去他日又問明曰監院異時兒孫遍天下在何用忙為一日明出師偵之小徑擲住曰者老漢今日須與我說不說打汝去明日知是般事便休語未卒師大悟一日明上堂師問幽鳥語喃喃辭雲入亂峰時如何明曰我行荒艸裏汝又入

深村師曰官不容針更借一問明便喝師曰好喝明又喝師亦喝明連喝兩喝師禮拜明曰此事是個人方能擔荷師拂袖便行頌曰。

斬釘截鐵無多子陌路知歸出格流十字縱橫明殺活拖犁拽耙自悠悠。

第十三世白雲端禪師參楊岐岐問受業師為誰師曰茶陵郁和尚岐曰聞伊過橋遭擲有省作偈甚奇能記否師誦偈岐笑而趨起師愕然通夕不寐黎明咨詢之岐曰汝見昨日打毆攤者麼師曰見岐曰汝一籌不及渠師復駭曰意旨如何岐曰渠愛人笑汝怕人笑師大悟頌曰。

等閒撥動鉤頭線未解翻騰度碧霄忽爾衝開泥水路清光透脫任逍遙。

第十四世五祖演禪師參白雲遂問南泉摩尼珠話雲叱之師領悟獻投機偈曰山前一片閒田地又手叮嚀問祖翁幾度賣來還自買為憐松竹引清風雲特印可令掌磨事未幾雲語曰有數禪客自廬山來皆有悟入處教伊說亦說得有來繇舉因緣問伊亦明得教伊下語亦下得祇是未在師遂疑私自計曰既悟了明得說得如何卻未在參究累日忽然省悟從前寶惜一時放下走見白雲雲為手舞足蹈師後曰吾因茲出一身白汗便明得下載清風頌曰。

官街驛路禁行夜便是人間未肅時不得將軍親努力那能端拱太平基。

第十五世圓悟勤禪師為五祖侍者一日部使詣祖問道祖曰提刑少年曾讀小艷詩否有兩句頗相近頻呼小玉元無事只要檀郎認得聲部使應喏喏祖曰且仔細師侍立次問曰提刑會否祖曰他祇認得聲師曰祇要檀郎認得聲他既認得聲為甚卻不是祖曰如何是祖師西來意庭前柏樹子響師忽有省遽出見雞飛上欄干鼓翅而鳴乃曰此豈不是聲遂呈偈曰金鴨香銷錦繡幃笙歌叢裏醉扶歸少年一段風流事祇許佳人獨自知祖遍謂山中耆宿曰我侍者參得禪也頌曰。

相逢未許春光好別有高高格外天忽得到來風月夜不愁無處樂瀟然。

第十六世虎丘隆禪師謁圓悟悟問見見之時見非是見見猶離見見不能及舉拳云還見麼師曰見悟曰頭上安頭師聞脫然契證悟叱曰見個什麼道理師曰竹密不妨流水過悟肯之有問曰隆藏主柔易若此何能為哉悟曰瞌睡虎耳頌曰。

不守舊來閑田地被人換卻別山居長年傲骨渾如醉一任煙霞漾翠廬。

第十七世應菴華禪師見虎丘侍行半載頓明大事丘忌日師拈香云平生沒興撞著者無意智老和尚做盡伎倆湊泊不得從此卸卻干戈隨分著衣喫飯二十年來坐曲条木懸羊頭賣狗肉知他有甚憑據雖然一年一度燒香日千古令人恨轉深頌曰。

聾人撞入瞽人隊賣醜家風不可名彼此渾無巴鼻事轉深思處轉憎生。

第十八世密菴傑禪師參應菴一日菴問如何是正法眼師遽荅曰破砂盆菴領之未幾辭白省覲菴以偈送曰大徹投機句當陽廓頂門相從今四載徵詰洞無痕雖未付鉢袋氣宇吞乾坤卻把正法眼喚作破砂盆此行將省覲切忌便躲跟吾有末後句待歸要汝遵頌曰。

贏得一雙窮相手分文不值甚家珍填溝塞壑郎當甚古佛聞風亦動嗔。

第十九世破菴先禪師參密菴菴住靈隱師分座有道者請益曰胡孫子捉不住願垂開示師曰用捉作麼如風吹水自然成紋頌曰。

劍樹刀山羅剎域鑊湯鑪炭鬼門關閻王終不受斯考識破其中總是閒。

第二十世無準範禪師初謁育王佛炤炤問何處人師曰劍州炤曰帶得劍來麼師隨聲便喝炤笑曰者烏頭子也亂作後至靈隱破菴居第一座同遊石筍菴有道者請益胡孫子話師於侍傍大悟後開法一香供破菴頌曰。

青波無透月何來炤見眉毛八字開萬別千差俱歷落滿懷風趣絕安排。

第二十一世雪巖欽禪師在無準會下每遇入室舉主人公便可[跳-兆+孛]跳舉衲僧巴鼻佛祖爪牙更無下口處此病礙在胸中十年後過浙東天目兩山偶佛殿前行忽然抬眸見一株古柏觸著向來所得境界和底一時颺下礙膺之物撲然而散始見徑山老人立地處正好三十拄杖頌曰。

腳下蹤繇路可行目前未透總非真豁然觸發渾無礙任運堂堂廓古今。

第二十二世高峰妙禪師謁雪巖纔問訊被打出後凡入門巖便問誰與汝拖者死屍來隨即打出後因睹五祖真贊忽然打破疑情一日巖問日間浩浩時作得主麼師曰作得主巖曰睡夢中作得主麼師曰作得主巖曰正睡著時無夢無想無見無聞主在什麼處師無對遂奮志入龍鬚越五載偶同宿友推枕墮地作聲廓然大徹自謂如在網羅中跳出元來祇是舊時人不改舊時行履處自此安邦定國天下太平一念無為十方坐斷頌曰。

打破棺材是活屍明明瞠眼又思惟雖然再得翻身轉鼻孔何曾向上垂。

第二十三世中峰本禪師因觀流泉有省詣高峰求證峰打趁出既而民間訛傳官選童男女師問忽有人來問和尚討童男女時如何峰曰我但度竹篋子與他師於言下洞然徹法底源峰書真贊付師曰我相不思議佛祖莫能視獨許不肖兒兒得半邊鼻(頌曰)。

獅子咬人沒忌諱象王蹴踏詎容窺張牙距爪機輪露無位真人脫灑歸。

第二十四世千巖長禪師見中峰峰問日用如何師曰念佛峰曰佛今何在師擬議峰厲聲斥之師求示法要峰授以狗子無佛性話三年因往望亭聞雀聲有省峰復斥之師憤然夜半忽鼠翻食貓器墮地有聲恍然開悟覺身躍起數丈如蟬蛻汗濁之中浮游玄間天地一時清朗復往質峰峰問趙州何故云無師曰鼠食貓飯峰曰未也師曰飯器破矣峰曰破後如何師曰築碎方巖峰乃微笑頌曰。

半途煙雨濕眉端未獲風吹那得閒歸到畫堂山色暮一聲玉笛喚開顏。

第二十五世萬峰蔚禪師謁千巖巖便問將什麼與老僧相見師豎拳云者裏與和尚相見巖曰死了燒了向何處安身立命師曰漚生漚滅水還在風息波平月映潭巖問不是心不是佛不是物是個什麼師以坐具打一圓相叉手而立一日普請斫松師拈圓石作獻珠狀曰請師酬價巖曰不值半文錢師曰瞎巖曰我也瞎汝也瞎師曰瞎瞎巖命師充第一座一日巖上堂舉無風荷葉動必定有魚行師震威一喝拂袖便行巖示偈曰鬱鬱黃花滿目秋白雲端坐碧峰頭無賓主句輕拈出一喝千江水逆流頌曰。

廓徹師資盡滅門擎頭帶角氣雄奔崑崙踢轉無回互匝地風雷海嶽昏。

第二十六世寶藏持禪師久依萬峰峰付師偈曰大愚肋下痛還拳三要三玄絕正偏臨濟窟中師子子燈燈續燄古今傳頌曰。

正法眼藏都滅卻撐撐拄拄是何宗誰知無事生多事鼓弄人家罪莫窮。

第二十七世東明岳禪師因睹松有省見寶藏具陳悟因藏斥之遂親炙座下一日藏問心不是佛智不是道汝云何會師向前問訊叉手而立藏呵曰汝在此許多時還作者個見解師乃發憤至第二日驀然徹法源底遂呈偈曰一拳打破太虛空百億須彌不露蹤借問個中誰是主扶桑湧出一輪紅頌曰。

拽翻自己閑巴鼻一擲天輪透頂關峭峭巍巍孤卓卓當堂奮出爪牙班。

第二十八世海舟慈禪師初於萬峰機下有省遂廬于洞庭山後一僧呵其見解師即棄菴詣東明一日明問曾見人否師曰見萬峰明曰萬峰即今在什麼處師罔然明曰恁麼則何曾見萬峰師歸寮三晝夜寢食俱忘偶香燈繩斷墮地廓然大悟詣關前呈悟繇明曰老闍黎承嗣萬峰去師曰和尚為我打徹豈得承嗣萬峰明遂出關陞座曰瞿曇有意向誰傳迦葉無端開笑顏到此豈容七佛長文殊面赤也茫然今朝好笑東明事千古令人費唾涎幸得海公忘我我濟宗一脈續綿綿擲拄杖云千觔擔子方全付玄要如今拄杖談以拂子擊三擊下座頌曰。

見得乾坤大似斗如何撥著便模糊眼光廓落超方外始信從前不丈夫。

第二十九世寶峰瑄禪師因海舟造塔院斧傷足有省乃充火頭一日負柴舟見曰將棘刺去作甚麼師曰是柴舟呵呵大笑師罔然舟曰是柴將去燒卻師遂起疑曰和尚畢竟是個什麼道理故爾問我是夕刻意參究不覺被火燎去眉毛面如刀割以鏡照之豁然大悟作偈呈舟舟便打師奪拄杖曰者條六尺竿幾年不用今日又要重拈舟大笑師又呈偈曰棒頭著處血痕斑笑裏藏刀仔細看不是英靈真漢子死人喫棒舞喃喃舟曰即此偈語可紹吾宗頌曰。

天自蒼蒼水自清銀鉤驀鉤渡江人反流棹轉村邊岸得路歸來滿面春。

第三十世天奇瑞禪師參寶峰峰問甚處來師曰北京曰別有去處麼師曰隨方瀟灑曰曾到四川否師曰到曰四川境界與此間如何師曰江山雖異風月一般寶豎拳曰還有者個麼師曰無曰因甚卻無師曰非我境界曰如何是汝境界師曰諸佛不能識誰敢強安名曰汝豈不是著空師曰終不向鬼窟裏作活計曰西天九十六種外道汝是第一師拂袖便行寶乃付偈曰濟山棒喝如輕觸殺活從茲手眼親聖解凡情俱坐斷曇華猶放一枝新頌曰。

放開一線針來往掣斷玄津鱗鼓腮吸盡太湖千萬頃滔天浪湧響如雷。

第三十一世絕學聰禪師依天奇奇問苦樂皆心因何外取師曰祇為不了曰是非皆事因何妄承師曰錯認定盤星曰迷悟皆人因何不懂師曰早知燈是火豈向四方求奇乃付偈曰道者心同慈嫗心爭教赤子困群陰輔成架海金樑子佛缺方知補浩任師後居龍泉寺有僧問如何是本來面目師曰石香亭僧云便恁麼去時如何師曰喪卻了也僧問今朝孟夏八日天下叢林皆慶如來降誕之辰未審如來何處降生師於几上畫個圓相頌曰。

春園爛熳花浪潑弄蝶爭妍撲鼻香日落茆簷天色晚一輪霜月照池塘。

第三十二世笑巖寶禪師參絕學便問十聖三賢已全聖智如何道不明斯旨學厲聲曰十聖三賢爾已知如何是斯旨速道師下語不契一日洗菜次偶一莖菜墮水逐水圓轉捉不著忽有省遂攜籃歸學見便問是什麼師曰一籃菜學曰何不別道一句師曰請和尚別問來後與學圍爐次學曰人人有個本來父母子之父母今在何處師曰一火焚之學曰恁麼則子無父母耶師曰有即有佛眼覷不見學曰子還見麼師曰某亦不見學曰為什麼不見師曰若見則非真父母遂呈偈曰本來真父母歷劫不曾離起坐承他力寒溫亦共知相逢不相見相見不相識為問今何在分明舉似師學深肯之頌曰。

河頭水向河頭賣就手贏錢就手彰一段風流惟自得綠叢翠裏帶歸香。

第三十三世幻有傳禪師聞燈花爆聲有省直造北方參笑巖求證巖曰汝將從前得力處一一說來師具實荅語中間巖驀趯出鞋曰向者裏道一句看遂把師話端一齊打斷師通夕不寐明晨佇立簷下巖見喚師師回顧巖翹一足作脩羅障日月勢師當下脫然一日巖入堂曰我者拄杖要與人要有要底麼首座曰某甲要巖曰汝要作麼座曰要他鏟斷天下人舌根巖以杖架肩曰榔栗橫擔不顧人直入千峰萬峰去師躍然下禪床曰恁麼須分付某甲往前迎取巖笑曰汝當久久執持一番始可打艸去也乃贈一笠曰以此覆之無露圭角頌曰。

衣錦丈人遭打劫渾身脫落赤條條從茲撒手還鄉後萬古清寧樂舜堯。

第三十四世密雲悟禪師因挑柴過一山灣見一堆柴突露面前忽有省遂依幻有和尚脫白請益幻曰汝若到者田地便放身倒臥嗣後惟加罵詈師慚悶交感一日城歸過銅棺山頂忽覺情與無情煥然等現正所謂大地平沉底境界時幻遷北京乃往覲幻問汝有新會處麼師曰一人有慶萬民樂業幻曰汝又作麼生師曰某甲得得來省覲和尚幻曰念子遠來放汝三十棒師抽身便出一日幻問忽有人問汝如何祇對師驀豎拳幻曰老僧不曉得者是什麼意思師曰莫道和尚不曉得三世諸佛也不曉得又一日幻舉拂問諸方還有者個麼師震威一喝幻曰好一喝師連喝兩喝歸位幻囑師扶佛法師呈偈曰若據某甲扶佛法任他○○○○○都來總與三十棒莫道分明為賞罰頌曰。

巢頂鐵船獨駕時閭浮界闊縱橫機分明顯煥無私也一道真風掌握歸。

第三十五世費隱容禪師初參壽昌博山及雲門皆不能了手有偈見志曰吾年二十五氣海吞佛祖不過古人關豈踏今時路後聞密雲和尚過越寓吼山遂謁便問覲面相提事若何雲以番菩提珠便打師曰錯雲又打師便喝雲祇管打師祇管喝至第七打頭顱幾裂所有伎倆知見一切冰釋直下似塊鈍鐵一日雲問薰風自南來殿閣生微涼汝作麼生會師曰水向石邊流出冷風從花裏過來香雲曰離了此又作麼生師曰放和尚三十棒雲曰除卻棒又作麼生師便喝雲曰喝後響師曰更要重說偈言雲便休去頌曰。

橫吞佛祖氣昂藏虎口翻身步大方突現三頭并六臂羅龍打鳳顯威光。

靈機觀禪師語錄卷四

頌古

世尊初生。

廓落孃生面橫身便截流軒昂吞宇宙大地孰為儔。

世尊陞座文殊白椎云諦觀法王法法王法如是世尊便下座。

腳跟纔動涉淆訛更把鉤牽犯手多盡謂機前都漏洩詎知平地起干戈。

長爪梵志與世尊索論議。

深藏鬼窟建昇平何處消閒可樂身陸地踢翻波浪黑豁開天日見全真。

世尊因乾達婆王獻樂。

一絃撫動顯靈機物物頭頭盡展眉妙運風流多意氣卻將迦葉作猜疑。

世尊於涅槃會上以手摩胸告眾。

觀體風光杳莫名摩胸告眾已多爭醫來死馬成何用賺及平人落火坑。

世尊示寂金棺從座而舉高七多羅樹。

開口已經遭打殺臨終又賣醜行藏生平浩氣難收拾死到棺材也發狂。

武帝問初祖如何是聖諦第一義。

有貨不愁無買主如何賤把本錢虧分明有理終難訴獨自淒淒暗渡歸。

祖命門人曰時將至矣汝等盍各言所得乎最後慧可大師禮拜依位

而立祖曰汝得吾髓。

潦倒胡僧入草深令人白日暗中尋神光特地施三拜也是門栽荊棘林。

百丈焚狐。

脫卻破氍毹通身衣錦歸雖然榮耀極埋沒自家威。

臨濟上堂次兩堂首座同時下喝。

白刃交鋒絕擬倫纔分利鈍喪全身鉤頭有餌難吞吐傀儡抽牽見活人。

臨濟示眾云大凡演唱宗乘一句中須具三玄門一玄門須具三要有

權有實有照有用汝等諸人作麼生會便下座。

藏身只在一毫裏鬼臉揉來面目殊誤賺許多迷夢客攀花折柳逐岐途。

三句。

一筆丹青畫不成更加點綴始分明縱饒巧設多般態何異靈龜拽尾行。

臨濟應機多用喝會下參徒亦學師喝。

家門弗禁每招災惹得韓盧逐塊來徹困老婆心未死猶憐稚子不成才。

臨濟將終云吾滅後不得滅卻吾正法眼藏。

千年鈍鐵夜生光聲價遼天孰敢當不意逆兒先捉敗等閒拋出賤如蜣。

趙州訪二菴主。

尋常家活人人具一種風流識者稀三寸舌尖鉤鎖處誰能指出趙州機。

國師三喚侍者。

三應三呼負汝負吾慣將惡水覷面糊塗喫遍界明明藏不得何須特地費分疏。

首山竹篋子。

腦後拈來活似龍當陽獨脫杳無蹤堪憐滯殼迷封者海闊天遙路不通。

大梅住山後馬祖令僧往問曰和尚見何道理便住此山梅曰馬大師向我道即心即佛。

秤錘落井不須尋擬欲追蹤墮更深徹底窮源無變易豈墮塵世逐浮沉。

香巖上樹。

現成風月沒多般上樹生涯卻似瞞笑裏賊身藏不得惡聲流布遍塵寰。

興化擯維那。

白棒當頭徹骨貧更加趁出絕疏親賺他無限盲聾漢開眼都云打克賓。

靈雲見桃花。

靈雲有眼花邊失貽累玄沙摸壁行人艸且深人不委至今狼藉滿江城。

大為示眾云有句無句如藤倚樹。

證龜成鳖意何愍語的言端轉不堪可惜肝腸剖露了空開笑臉卻羞慚。

法眼二僧捲簾。

覷面相呈人易會舌頭翻轉許誰知可憐一對郎當漢開眼遭他腦後椎。

世尊在忉利天為母說法。

梅檀雕就紫金身特地逢迎意氣親慚愧瞿曇清白眼無端又著一沙塵。

城東老母不欲見佛。

川流縱出競奔騰桂棹橫空截未能識得源頭皆是水任他波浪碧層層。

泗州大聖。

出門車馬可驅馳酒喫長安正樂時義膽相逢添醉後遙聞千里動愁思。

陳操見資福。

街頭驀撞舊商人買賣如何見得真不但兩家都失利從前知已反相嗔。

雲門一曲。

老大躑躅應事乖護身只靠一招牌零零落落渾無樣能使瞻風動遠懷。

女子出定。

無端畫地卻成牢一任神愁鬼慟號泥裏刺藏輕撥出等閒誰著眼睛高。

五祖三佛侍立。

一個膠盆黑夜擲說青道白顯奇言誰知破業郎當子惹得哀聲送出門。

僧問曹山學人通身是病請師醫山云不醫僧云為甚不醫山云教汝求生不得求死不得。

抽人筋骨拔人腸勝似蠱家蜜裏礪此是單傳百驗訣不須他處覓奇方。

俞道婆賣油糝。

何處春風動故情笙歌堆裏醉平生不嫌陋質街頭露捏出油糝活眼睛。

睦州因秀才過訪會二十四家書。

秀才學藝世無強睦老荒疏一點彰公論有誰遮得眼惹他酸透鼻尖香。
無業禪師示眾云一毫頭凡聖情念未盡未免入驢胎馬腹直饒一毫
頭凡聖情念頓盡亦未免入驢胎馬腹。
拈出些兒釘眼睛誰知睛是眼中釘謾言擺脫超方外白日愁聞鬼哭聲。
福嚴容老和尚僧參尚問那裏來僧云杭州來尚云還得江西信麼僧
呈坐具尚云不是者個消息僧近前尚便打。
的的江西帶信來驀頭一撈別疑猜現成三昧都忘卻贏得烏藤到額腮。

書問

老人命代復曾心空居士

昨接華翰謂達摩西來盡大地是善知識寧必金粟而稱法窟哉山埜道居士不惟數千里外觀面相逢抑且穿卻古今老凍膿鼻孔了也但未能撒手掀翻到古人放身命處所以偈語中雖有本據可窺似未灑落根蒂何故不疑之地時人知有拈提得來早已落二須知威音那畔空劫已前箇箇眉橫眼露壁立萬仞必無待達摩西來方顯發斯端倪耳然山埜因風吹火未委居士面門又向何處躲避耶速道速道。

復海鹽張禹侯居士書

接尊翰足三載矣披靡日病未能酬復深見居士為道敦篤猶不我責而又殷殷垂注以好音頻寄媿荷山中何可克當謝謝細讀來示謂向蒙慈誨奚啻振矇但塵緣未斷牽絆者多惟念念兢兢以不克副為懼即此數語以墮細膩泥穿似未直截猛省提究為切須知此事實不恁麼古有抱子弄孫色色如舊之語此段景況願居士勿生異見別作途程只向此處咬著自看塵緣何物牽絆何人然雖與麼貧衲有口終不說破須是張禹侯自肯點頭方敢指出且道指出箇什麼速道速道。

復福嚴靈嶽和尚

祖庭重任非有力大人莫能荷負吾兄繼席三載道望丕著誠可謂克家者矣欣羨欣羨茲復退已讓人乃以推舉之責相屬弟何敢當然以愚見別選住持能否未定莫若吾兄久任斯席之為愈也且先人已惟有惟德是託之囑幸高明裁之肅此布復不一。

與梁日章居士

只是一箇梁日章當下腳踏實地去天下善知識不奈你何何故只為識得梁日章真不受欺瞞若于梁日章外別有枝葉可攀正是拋家浪走于梁日章分上全無交涉來論所謂說時忽覺清亮過時活如荷莖之露實難捉摸苦苦此苦未是苦忽若風翻荷葉露全歸水梁日章又在甚處安身立命者裏道不得纔是苦雖然山埜為梁日章早道了也梁日章還覺面熱否。

與北京張顥侯孝廉

士大夫信此道者最難能誠信而力行者尤難今居士既誠信矣力行矣便好將箇無義路話頭拶碎生死窠窟直得信亦不立行無所行便是到家時節方不辜居士一番決烈志氣耳。

復朱太赤文學(二則)

蒙垂顧不惜眉毛與居士葛藤一上殊覺狼藉不少此無他蓋謂青天白日無處藏賊故不得已和賊捉敗已為居士覲面證據了也將謂直下承當別無岐路誰知偷心未死又來納敗今幸人賊現獲轉送臺前若係真賊計賊定罪若係假賊要求山埜慈悲通箇消息好與當頭一棒若諳棒頭落處則便見真賊現前更無消息可通亦無真假之見存於胸次向人定奪可否惟作得主把得定施機發用隨處自在與從上乃佛乃祖及天下老凍膿一鼻孔出氣更非別人雖然是賊識賊未審居士異日相見還解轉身否咄直饒轉得身來猶是竊物以當家寶急須火速拶出蓋天蓋地一段光明從胸襟流出纔是法門真種艸也。

又

承教謂滯紅塵四十五年也自知不是百年常住只此兩語便是居士歎息光陰省察生死之念切正當此際切忌別覓安身就向此大男小女米鹽酒肉裏輾作一團昏陀陀地上振起精神看父母未生前此段境界從何而有今既推撥不開一口氣不來時又向何處安頓到者裏盡居士聰明知解胸中所有韜略總用不著須是居士刻刻痛念無常時時警覺生死回頭自看看來看去看到水窮山盡處豁開兩眼伸手摸著鼻不覺大笑一場方知此大男小女米鹽酒肉不是別物乃是當人破暗慧炬刮目金鑕借此翻身直入安樂家鄉纔是紅塵堆裏快活自在漢也不見唐時有箇龐公看破此事將家財拋棄湘江作一偈有男不婚有女不嫁大家團圞頭共說無生話後來宋時又有箇楊傑翰林摸著龐公鼻孔忍俊不禁亦作一偈男大須婚女大須嫁討甚閒工夫更說無生話看者兩箇措大俱是紅塵俗漢各占本地風光便解賣弄世出世間大事又何曾以大男小女米鹽酒肉而作拖累之見乎雖然更有一處淆訛只如龐公道不婚不嫁楊又道須婚須嫁兩邊不

立中道莫居請居士別具手眼通箇消息看因兩次來翰諄切山埜亦不覺饒舌至此。

復沈虎臣居士

敬讀尊諭有見道之資而未得入道之要蓋為拋棄利刀快斧不能直下劈破生死窠窟以致奇巧識情蘊為家賊作祟日深不獲自在在此病非獨居士無由淨絕盡大地人未得心眼融通便墮此境者比比皆是今無別法為居士曲垂方便但請居士自認自家是家主直據家中堂堂正坐然後左之右之眼見耳聞歷歷分明畢竟承誰恩力而能號令一切當恁麼時向箇裏作得主把得定不被諸塵作鬧好醜存情便是安家樂業時節任他佛來魔來天來神來擬欲窺越此箇堂奧不消咳唾一聲永自迴避無門縱使家賊作祟亦不須著心排遣而但云賊賊已自迷頭怖走于無邊方矣此是當人應驗契券執炤在手歷劫至今疆界分明無敢移易絲毫許居士更須摸取自家鼻孔與三教聖人鼻孔一耶二耶苟若一二存見鼻孔卻成兩箇未免隨賊奔馳錯認山河作眼睛是還家消息而不為劫掠者幾希向後不識居士又向何處住腳速道速道。

復海鹽張小白內史

山埜孤巖抱拙與世疏渺兩蒙台護破格垂注非乘願山頭莫能發此誠至之心而信荷若是耶謝謝承施金牛飯為令公郎百日之囑即昇應供堂招諸和尚子箇箇喫得飽齋齋不惟使令公郎冥路逍遙即尊家亦獲福無量矣山埜忍俊不禁為之饒舌讚和云但願春風吹不老瞎驢笑得口門開此復。

復虛白西堂

舊臘爾璘來見所敘述已知上座生平之學殊不介意及見與慈老師夢中一段因緣又知上座有肩荷之志然從上來事任重非輕須有堅忍乘願之力方堪克紹若忽然與麼忽然不與麼則欣厭取舍之念未忘不逐落花紅片片定隨流水碧層層矣更欲山僧禪板發落有何益哉雖然賊原無種慈老師難辭其責現有真正白拈立待上座翻轉面皮始見親切。

復福嚴古風和尚

福嚴祖庭弟已繆住三載兄今光燦師室三年可謂名既正言亦順矣但欲推譽繼席者主行其事與曹護法商議敦請又不在弟為今日之長而區區

及此也況師門昆季尋常可否惟兄備悉弟自去秋病目至今昏昧尚未清脫萬一有失正來諭所謂當此時風衰薄之際經歷人情意況殊覺寒心非兄多年舊識莫能發此真切之諭使弟痛感至言也聊此艸復統祈垂諒謝不盡。

與至印西堂

書至別後履歷大概俱已備悉但福塘風景未是弘道之時吾徒久戀在斯似非究竟山僧去秋九月受福嚴檀護之請以此心無媿勉力維持而叢林庶得安妥龍象俱各遵規恍若先人冥助之力亦一快事也想吾徒聞此必發英概之志以為人急切之願束裝出嶺互相輔弼以光祖室此是山僧之所重念焉惟吾徒勉其行以慰所望。

與滇南茹蘗西堂(二則)

山僧去秋九月赴石門福嚴之請雖有數百衲子輻輳其間而朝夕為人提挈殊覺神倦思上座以履真實踐臂力之助而末由所致茲得書欣快殊甚然尤見有殷念思慕之誼故特具數行與上座束裝下來互相輔弼以光祖庭是山僧之所屬望亦是上座利人行志之時也幸勿以筋力不逮他事為辭至囑至囑外法語三則理直詞暢但初則於轉折處似覺寬緩不切宜知之。

又

前七月初有復書一通與上座決志離楚以赴冬期之職不意書未入覽而具豐一燈二禪者至此番跋涉之勞益見上座以遠馳殷切之心念我多矣所寄難得之物次日即專僧分惠翔鳳而福嚴一眾俱感飽飫之力非山僧所能筆盡其意二禪者辛勞殊甚腳未寧暇又復著渠與涵禪同往非有宿契之緣安能若是惟上座體斯心速斯行毋辜老倒之懷以失眾望不盡。

復石門曹遠思司理

先師主持法門為此寺一代中興當以臨濟正宗三十一世為傳其高僧神僧聖僧別有品列非從上統係所關幸囑諸秉筆者為荷紀年錄行實及遺囑語謹以奉覽。

復曹遠思司理留再住福嚴

前接台翰伏讀至再不禁感泣復承玉趾枉顧殷勤獎慰益覺赧汗無地矣足徵大護法深念祖庭而垂情于衲如此一字一句發于肝膈衲非木石敢

不銘心鏤骨乎但衲過福嚴時于資福諸職原議以三載為期今百事廢弛人心解散若久假不歸即同棄置若云兩處兼理而以衰邁之年心血枯槁顧此失彼得不為智者所竊笑乎至于同門中別請實天童讓迭主之式既曰嗣法者例皆有分即宜次第住持庶為法門盛事非僅為飭讓以息諍也承護法之所以諄諄誠勉者本為深體令先慈之德曲盡金湯之誠在衲于勢必不能留于理正宜引退去就之義庶乎不苟伏望護法矜其豕鹿之性早賜還山幸適餘年始終佩德臨穎無在惶悚待命之至。

與白雲子素上座

老僧新歲忽得風疾其衰頹老態難以筆畫上座高踞白雲正是埋頭蓄養之時切念授受匪輕晷刻于法自警使來學有所嚮慕庶不負擔荷從上大事也開宗來特書數行慰汝安分住山慎勿以老僧為慮至囑至囑。

答嘉禾頂居士

承敘述參見先輩及諸方尊宿無不親覲請益毒恨宿無靈骨未透向上關捩欲山埜扶起鈍根使百年古鏡一旦復明啣結之恩不獨遙空頂禮已也讀至此好與三十棒棒與居士見血染紅秀水一溪流豈是分外雖然且作死馬醫向數問處一一略露鞭影會與不會是居士分上事山埜終不敢再為分疏更添枷杻也此復。

問如何得成佛作祖去。

答會取煙雨樓。

問問道於盲意旨如何。

答偷心路絕。

問了得一萬事畢玄墓剖和尚如何發願西方。

答長安路上笑行人。

問一靈未假胞胎時在何處安身立命。

答切忌迷頭怖走。

問東家作驢西家作馬請一語。

答總是者一頭。

問要騎便騎要下便下意作麼生。

答元來卻是汝。

問如何是祖師西來意云庭前柏樹子與神前酒臺盤是同是別。

答不解指數勞動算盤。

問寒時寒殺闍黎熱時熱殺闍黎如何得無寒暑去。

答捏著鼻孔看。

問暫時不在如同死人不在箇甚麼。

答門前石敢當。
靈機觀禪師語錄卷五

嗣法門人 超翼 重編

侍者 超震 普定 同閱

雜偈

復本充禪師

繾綣囊藏發動機喜逢春色送君歸雲山處處隨高踞謾使天花歷亂飛

募禪堂瓦

豁開虛空大口頂門露出青天看來賣弄家醜不如蓋覆為先

化米

佛法禪機不道無祇緣篋東肚皮枯等閒若有知音者休用頭陀為指呼

化油

拶透河沙半點無閒敲石焰見偏枯看來一段光明處盡在檀那筆底敷

復朱同文偈

大地看來箇同文同文之外更何論山僧證據無餘說佛祖多將一口吞

募鑄大鐘

鳳山梵剎重興起晨暮鐘聲尚寂沉幸有雲間多妙手當陽擊扣盡知音

募脩安和寺

下溪灣畔古禪林寺額安和宋至今脩葺不因檀護力風規爭見日光新

化碗

玉骨冰肌絕覆藏此身常見為人忙二時家活隨豐儉一味無私徹底彰

東茆蓬妙宗禪人乞偈化米

新關東菴已十年道心每結水雲禪雖然笑臉從人妙空腹難教飽白泉

化布袋

十字街頭笑逢人覓布袋看誰發妙思會取此三昧

題扇示慈雲禪人

掌握分明任運彰全憑箇裏現清涼此時若不開惺眼更待何人為舉揚

丐大銅鍋偈

大冶爐中久煉烹全身脫出體崢嶸頑金且喜成法器好與叢林調眾羹

寄白雲子素後堂

法社凋零值晚秋殘丫敗葉亂峰頭白雲高突孤巖上自有瞻風意氣投

即事

囊有千金重看來亦是塵自從家喪後羞見錦衣人

受普寧請荅諸禪德

砂鍋久閣白雲邊煨爛虛空不記年今日既逢調鼎手何妨掇出共烹煎

回閩省親

鐵鑄肝腸忤逆兒面皮翻轉已多時只緣觸著娘生底千里迢迢涉水泥

送僧之武夷

武夷山色正秋清此日辭行動遠情折筍峰前景未勝為余更覓一峻
[山*層]

除夕

生涯蕩盡沒纖塵掃落年華徹骨貧迷悟總途誰得失賢愚同體孰疏親
一爐冷煖今宵火半榻清閑此夜身翻笑水雲無定力幾隨杖笠欲迎新

金粟主山

巍然突出勢孤雄朝拱群巒獨露中堪笑當年點數者如何到此卻迷蹤

神書藏經

大藏由來不較多揮書一夜竟如何雖然顯發神通異弗落毫端會也麼

寄友

睡虎峰前送別時竹林秋色尚依依于今屈指春將半幾見殘花又放枝

鏡菴坐雪

幽然兀坐絕思惟何事天花繚亂飛堪笑上蒼多意氣擬來漏洩楚僧機

聞孤松壽徒訃燈下四吟

篝燈獨坐不成眠驀地追思暗淚漣苦我一身林下老愁同松際夜濤宣
一株挺出群峰外榜樣山門望汝先豈料昆嵐吹折後蕭條猿鳥兢悲憐
雪霜堆裏獨孤標臘盡方知歲後凋今日忽成無影樹為誰景致別山招
成林獨樹已稱奇天不全才亦汝悲借宿溪邊開夢眼再翻觔斗是真兒

過江郎

跨盡危層觸斗傍遙觀三片勢昂藏天教俠骨難遮蓋特與人間作棟梁

示慧初上人

發足泉南一念時慧心初炤了無依不從個裏開惺眼盡是區區客作兒

御書樓

層巒疊疊彩雲飛千載如同御駕垂休問樓臺存與廢祇今泉石尚流輝

仙螺池

體態分明出自然為何去卻尾巴尖看來靈異成奇特磊落清波個個圓

鉢盂案

盡日門前口向天不曾輕易乞人間須知本有生涯別吸露餐雲那計年

九龍戲水

群聚雄雄露一班慣能滴水起波瀾休教打濕袈裟角試為傾湫倒嶽看

治升董居士薦室請偈

從茲踏著來時路赤體條條信步行踢脫靈光隨處現超然獨自證無生

甲午春贖大塢古院基樹

古剎何年廢墜來尚遺老樹護蒼苔為憐刀斧傷心處留與空門作棟材

和海寧顧邑侯韻

灰頭垢面擬何緣驀契當機只一拳獨脫無依窮徹骨休來更索止啼錢

示法則禪人(善泥水)

石頭大小皆成器瓦礫零星亦妙機三合土中立腳穩縱橫何處不風規

中元薦親

胞胎未出識爺娘一度追思一度傷數陌紙錢隨例設粉身碎骨卒難忘

示星幢師姪

銀河點點孰安排此段風光莫浪猜冷地賺他窺得破至今猶恨雪山埋

坐大展記室寮觀桂偶成

觸目難禁物興長乘時敷展悅秋光老僧不解多饒舌噴鼻隨他自覺香

除夕述懷

逐隊班班是瞎驢相看歲暮笑云除忍饑不暇無他策篋束三條樂有餘

解制有感

腳下家山路未還艸鞋今著出松關擔頭春色分明道此事須教不自瞞

寄天孚上座

翔鳳山前狹路逢眼開誰不笑春風歸來上國情何似莫負生平氣象雄

示華嶽居士

曠大劫來一著子多生培植此時身此身墮在閻浮際夢破方稱出格人

示幻觀侍者

十載巾鉞幻侍者朝參暮請我何為今朝看破無多子始見人人鼻孔垂

示心宗上座

汝在吾邊親近久樸實頭見不道無恢廓此心能變化門風終不倩人扶

募興造

扶盡千山水支撐古道場必須擔荷漢出手共扶揚

化豆

冷灰豆爆是何時信手拈來顯妙機磕著者些消息子方堪受用大家知

化醬缸

紅爐拶出口空開日用無私任取裁漫道當年不曾少全憑個裏曬將來

化齋米

問禪不會玄妙落筆全無孔周只有些兒快樂敢言飯飽便休休休驀地
撞他如信及瞎驢肚大不須愁

募藏閣

一標獨插待何人正是今朝應現身就手揭開心地藏重重樓閣盡光新

明初許居士為先室行敏請偈薦拔

採得空華結眾緣善根彌布福彌延施為本有風光事足下香飄朵朵蓮

真讚

雪峰互和尚像

泉水逆流突出者漢花劈鴻蒙宗風顯煥打頭為人處古佛未足稱慈徹
底掀翻時白拈猶欠手段盡道曾即示後身誰識古今同一貫咄莫驚嗟
重判斷閩邦從此不安寧個個瞎驢恣鬧亂

棲霞禪德行樂圖(未薙髮)

道汝是僧儒者其形道汝是儒釋氏其名儒耶釋耶吾不得而擬形兮名
兮吾不得而評然則公之造詣果在斯乎弗在斯乎咄背觸兩非渾坐斷
蕭然獨逸古松青

敬安師像

吾不識翁翁不識吾揮毫擬讚迴絕名模咄端然兀坐明何事淨信中興
始見渠

朱問心居士像

問心何似了心嘉瀟灑行蹤樂水涯周易展開讀未盡夢回消息笑空華

跋平陽弘覺和尚為張明遠居士所題真讚

利名滿世走天涯誰把身心歇片時兀爾忘緣苔石上多君占盡好便宜
好便宜不多得然獨云居士占盡者吾不知居士何所窺覷而得此段快
樂耶雖然還識弘覺老人因風吹火麼面目分明風規可慕當為鑽頭入
鬧恬不知返者警焉

張舜法居士請為先嚴明南公像讚

者漢面目初不相識纔到鳳山自討棒喫誰知暗地惺惺搆些衲僧氣息
且作麼生是衲僧氣息明翁明翁橫拈如意謾矜誇獨露當陽無等匹

浩如大展二上座為母超琛并自像請題

幻泡漚花聚會緣空門有子共歡然笑拈如意彌今古手握輪珠不記年
挂拂藤床唯侍坐即離此用任舒展好將者段真消息直透威音那畔前

棲水玉聲德聲昆仲請為先嚴聖裔呂公像讚

湛湛棲水點點澄清有公實德玉振其聲所以能向鳳山發多生之勝願
深心為法作請藏之主盟世出世間奇特事臨行撒手了無生

驚生禪師像

一杖春風何處行芒鞋擬踏萬山青滿懷心緒誰知委分付蒼松仔細聽

月臨上座像

擬子成標格如何早去身個中親切句尤喜念頭真

張道婆行樂圖

金剛固體彌今古本有風光受用多百八輪珠常轉換笑看歲月任婆娑

汪際斯居士乞題父臨終所畫大士像

面目分明儼然自在我觀大士無此體態際斯際斯有體態無體態毫端
認取自家爺始信風流格外塞

文益禪師像(菴名福田)

貌古春容道行堅鋤頭今放始安然知公已得栽培力受用多生在福田

東來戒子像

歷劫薰脩此日閒便宜占盡一蒲團不知明什麼邊事貌古神清只笑顏

福嚴老和尚像

最苦師心三十載維持法化血腥飛浣清歷祖源流派杜絕諸方濫續非
事屬至公天地震道弘正直鬼神悲話行早已遍塵刹鐵案高懸萬古輝
其二

口懸河兮眉挂劍掣開岐路絕廉纖葛藤窠裏清王化奇特須還老白拈

自讚(翔鳳大眾請)

闢艸開荒此鳳山業緣多累債難還不因衲子成叢席爭得龍天展笑顏
既無道德遺身後那有風光播眼前珍重諸賢齊側耳水流松韻莫嫌繁

至印方首座請

最無面目是者村叟不解蜜棗甜人只會黃連苦口明知良藥足堪嘉多
少攢眉而怖走休怖走幸有福塘方座元卻諳此味能分部

法立系西堂請

碓觜花開早漳州出汝來棒頭遺毒種喝下破疑胎幾多人努目獨汝恁
癡默法禪應有鉗錘別莫學吾儂始俊哉

嵩菴正藏主請

咄哉者個村阿默世上有誰似汝呆孤迴砂盆甘淡冷赤貧拄杖樂徘徊
只有一端人莫測冷灰豆爆出英才嵩藏主與麼來描得吾真成禍胎

子素學後堂請

標格由來具孤操樂此生炎涼不到處笑傲萬峰青分付素禪須記取吾
無別著可彰名

鐵山岑維那請

我像難描畫描畫終不真惟茲一著子據令絕疏親分付鐵禪弘願切何
愁祖道不光新

利禪恒藏主請

阿誰不識你高踞鳳山中弗顧門風冷只貴鑊頭蹤幸逢賢衲子輔弼梵
王宮如斯四十載快樂住山翁利公親我久描我容要知我無奇特處唯
有真實心流通

實相卓知藏請

老漢從來無造作據實提持乾爆爆白棒指伊看變化龍自昂頭蛇自縮
應驗當前辨若親為人眼目方不錯

巢風林藏主請

閻浮多厭汝頑賴不知時鐵船撐逆浪禿棒抵須彌人皆驚覆沒汝獨強
維持咄哉巢藏主膽大莫愁眉

大展翼書記請

混沌沌樸樸憨憨佛法不會世法不諳占住鳳山三十五年虛名遍布
罔顧思慚所以讚我者愧無是德毀我者是真實言賴有展禪多意氣攜
筇信荷在吾邊

璨衲章知客請

愛問壺公山如何在興化十箇有五雙無人答此話汝在吾邊住有年幾
番拶著幾驚怕今朝始信絕心思覲面分明無縫罅無縫罅暫且深藏巖
谷中漫將輕易與酬價

薦穀曠藏主請

白棒當陽點靈苗觸處花原非吾妙力有穀自生芽

止水智藏主請

自笑無心住芒鞋被業牽破盆存古格瘦骨獨撐天賺他龍象眾讎結盡
含冤止禪不憚親吾久此段清標要卓然

德水洧侍者請

卓立孤峰上天擎世外身為憐山骨老更愛水源深祖道悲秋晚宗風痛
日沉德禪能勉力不負廿年親

荊石侍者請

眼豁乾坤小胸涵萬象空為人端的處拶到水山窮珍重西江震侍者全
憑者著是吾容

英衲毅禪人請

減劫時逢法運秋白雲愁靄滿山頭不辭瘦骨撐衰力猶把孤筇絕眾流
英禪者志氣優果然不負靈山囑堪起吾宗向上籌

乾一知藏請

問禪禪不會問道道不知手提骨律棒兀坐擬奚為覲面乾禪應笑破風
光本有好施為

英發知客請

會取吾無相是真供養請子自揩磨英概吞群象吞群象遍界覓無相
似渠始見鳳山真倔強

元畸知事請

吾住茲山無別提持諄諄顧本依古行規汝稱知事應勞苦臨危不變始
光輝

東來戒子請

者箇老禿翁時事太朦朧有十分古樸無少許春風提持惟據本直道以弘宗廓落身心明似鏡任他龍象競趣從

佛事

挂板

師捧板云百劫千生打成一片懸挂高堂風光顯煥即此是叢林紀綱即此是衲僧關鍵且道聲前一句分付阿誰遂擊一下云號令甚分明當陽不隔線。

又

師云古聖垂慈芳規建立無非欲諸人領取釣頭意莫認定盤星然則者箇是定盤星作麼生是釣頭意伶俐漢一覷便透如來禪祖師禪驀鼻牽來好痛拳如或未然聽取下頭註腳鳴板一下云分明只者是不悟待何年。

為東明孤雲和尚火

南泉三不是趙州一箇無冷地驀相磕拍出谷谷呱不知是甚義寒拾笑盧都仔細拈來看元是東壁挂底大葫蘆大眾今日為我孤法兄茶毘因甚說者般話遂擲炬云知音說與知音聽一道清光入畫圖。

入塔

勸君先上東明去我即束裝隨後來者便是老兄當時留戀此山底句既親言出自親口今日又親自到此更要小弟說個甚麼雖然當陽顯露眾眼難瞞驀地收歸兄自道取遂捧起骨櫬云拶破虛空無縫罅任他千古水朝宗。

為韜明和尚起龕

師云久默斯要不務速說透體金風趁此時密移一步是高著遂以拄杖引之。

舉火

師云不可思議法惟兄說得妙火焰三世佛立地聽呼召鞭策泥牛吞大海指教木馬陷空鶴縱橫妙用顯神機搖落天花多瑞兆大眾此是堂頭老漢末後全提與諸靈山受囑列位金湯心眼相照共作証明底一段殊勝因緣

若也見得知恩報德只在今朝其或未然鳳山更為者漢播揚法化去也遂擲炬云頂門迸出一輪紅大千何處不光耀。

入塔

師云恭惟法兄和尚以一條白棒掀天揭地惱亂叢林三十餘年垂功立業既遇昌時羅龍打鳳一滿心懷先師未了公案迎恩渡一時復見光輝我兄同門出黃浦浪千古咸驚險峻所以有如是造詣具如是奇特驀地翻身迴出尋常預知得地天然受用且正當恁麼時如何是天然受用一句坐對浮屠忘彼此從教人喚法中王。

為慈門師太封龕

老師行處人天莫測瀟灑風規快樂自得惟其自得所以七十七年來履踐如霜孤操不易如今懶聽閨浮歌白雲深處藏蹤跡蹤跡既藏是汝諸人還知者老師落處麼遂掩龕咄一咄云當陽坐斷誰敢辨的。

起龕

翔鳳關前雲泛白鉢盂巖下水流清到頭一著無多子千聖咸歸此路行遂以拄杖卓一卓引出。

舉火

玲瓏巖畔久稱揚佐助先師道念彰末後茲山多意氣今朝受用好風光好風光絕比量遂擲下炬云全憑者點無私炤贈送雲蹤去路長。

為嵩嶽監院火

多年為眾監院今日山僧監你上是兜率陀天下是風輪水際東西南北俱玲瓏任汝逍遙隨所至正上座須記取臨歧無可贈行蹤末後全提只者是便燒。

入塔

超生脫死全憑者箇獨露當陽了無話墮乘時占得好風光全身直入裏頭坐裏頭坐休錯過三台須是大家催再出頭來重唱和。

指琦維那火

數載辛勤綱維法令叢林得以雅觀衲子亦賴安靖此是汝赤心片片助揚老僧底事正當今日格外翻身又將何與人通信擲炬云萬別與千差一椎俱打正。

覲顏柴頭火

南山樵盡北山樵堆積今朝一火燒惟有一株無影樹披今歷古赤條條諸人還知覲顏禪人於無影樹下超生脫死否若也未知老僧更為點破擲炬云不識東甌橘皮紅疑殺波斯舌頭赤。

文光禪人火

衲僧家要來便來要去便去延遲至今猶涉鈍置絕鈍置請看腳下焰騰騰便是文光安樂處。

聰睿庄主火

毫釐繫念三塗業因直饒一念未生猶是死水裏浸殺此是汝舊冬見處今日逗到者裏紅爐焰猛生涯路盡又明甚麼邊事咄還鄉調古無人聽申謝油資絕眾疑。

為禪人火

皮囊已脫卻精靈在何處直下便知歸開眼不受蔽既不受蔽且道煙消火滅後又如何指的擲火炬云路逢知己丙丁公爍破面門祇者是。

象開禪人火

終日跛跛搭搭向外馳求挨到今朝猶未心休何故晴乾不肯去直待雨淋頭擲炬喝一喝云劫火洞然燒卻了腳跟翻轉倒天流。

月脩火頭火

長年為眾燒火今日老僧燒汝汝燒火我燒汝如是因如是果擲炬云根塵器界盡消鎔透出光明淨裸裸。

濟生禪人火

撲面霜風冷千山雪未消衲僧行履別任運樂逍遙是則是忽有人覓你河南信又將何祗對擲炬云眼開無一物唯有赤條條。

澤超禪人火

山露連纏骨水流不斷觔莫忘今日事須記此時心且道如何是此時心以火炬打圓相云鍊鑄金剛圈一箇一回咬嚼一回新。

智恒禪人火(恒常為眾募鹽)

本色衲僧流分明汝一箇直下便翻身悄然無話墮既無話墮祗如遲延四十餘天又思念箇甚麼呵呵擲炬云莫忘鹹淡自家知今日消歸火裏坐。

湛輪相待者火

吾不辜負汝汝豈辜負吾如何卻與麼使我老心孤孤孤語水血流書不盡勸農多說也難模遂呵呵大笑云無端無端擲炬復喝一喝云不如一火燒卻免教彼此分疏。

入塔

師捧骨襯云巾瓶十載念切叢林只者去處是汝安身呼應不堪重話會斷腸聊慰裏頭親且道親箇甚麼遂送入云從前盡道閒相識今日方知是苦心。

少眉禪人火

衲僧行履處最苦病魔縛撒盡肚腸空今朝始安樂雖然安樂二字是山僧道底作麼生是你應時及節受用一句遂擲炬云會麼雙眉展起焰騰空雨灑行蹤阿漚漚。

飯頭定心禪德火

不用瞻星望月全憑者箇時節時節既到來大眾都歡悅且道歡悅箇甚麼羨汝識得定中心飯是米做鍋是鐵忽被南泉打破普化踢倒時又作麼生遂擲炬云豁開兩眼辨端由馬面驢頭俱炤徹。

湛如禪人火

衲僧家要來便來要去便去家家好風月處處安樂地何必徽州與休寧日日聲聲念不住阿呵呵一火為君燒卻了湛如秋月炤人間。

淨朗禪人火

未過洛陽橋風光俱遍該不知為甚麼空著艸鞋來雖然不到水窮山盡處爭肯翻身撒手罔撒手回死生箇裏無他路趁踏紅蓮火內開遂投炬。

值性慈茂火

癡癡憨憨醇醇樸樸苗稼不犯安心自牧鼻頭拽脫了無依撩起便行真快樂祇如人牛俱忘且道是何面目以火炬點兩點云休開兩片錯商量翻身直入無生國。

不較上座火

不較不較到此更須覺炤惟有靈明一著子了無奇特與玄妙既無奇特玄妙且道還有親切相為處麼擲炬云爍破者髑髏突出頂門竅。

遍也上座火

今日是上座絕後再甦底時節若也見得葉落歸根同得旨菩提觸目共全彰其或未然火光三昧與上座証明去也喝一喝擲炬云切須看取。

鵠林維那火

師呈炬云者便是鵠林上座末後一段光明幢山僧今日特為點出諸人還知者上座落處麼若也未知擲炬云罰錢出院成何事恩怨分明在此中。

鍾解脫火

昨日鍾居士今朝解脫僧(方薙染遂歸寂即建普同塔者)何緣得到此撒手法王城只如末後一句又如何履踐擲炬云烈焰光中聊寄足普同受用待功成。

巨範則副寺火

吾望子有發達之日子思我有末後之句今日方知不汝欺受用頭頭合本據且作麼生是本據火焰說與諸佛聽諸佛聽未真火焰說未是吾今不再三遂炬云會取箇中意。

聰聞會禪人火

多年為眾竭力今朝方始心休休休不須向外從他覓一念知歸便轉頭且轉頭後又作麼生擲炬云本來受用全憑此觸目風光任性遊。

素慥汧西堂入塔

師捧骨襯云衲僧造詣迴絕追攀揭露當陽徹骨冰寒三十年來真履踐人天目擊盡歡顏雖然此猶是西堂素公覲面相呈邊事祇如物外翻身密不通蹤又如何與伊安置遂送入云葉落金風消息至雲拖秋色入松關。

松江二禪人入塔

一對雲間客煙波泛渺茫今朝齊到此穩坐自家鄉大眾家鄉既已穩坐且作麼生與伊證據遂提起骨云描畫不成人世外風流徹骨絕商量。

為孫弘寰父母入塔

夢幻浮生事已周賢郎送入此山頭此山已植多生福福被多生享莫休大眾此是山僧為弘寰兩尊人末後表揚底句且團圓聚會又如何舉唱遂送入云覲面將相無異路各歸本際樂同儔。

清如耆舊火

舉火炬云大眾此便是者上座生平為眾真實脩持得一道光明幢山僧今日為他覲面點出直令未發道心者互相協力已發道心者同聲讚歎讚歎則且止且道者光明幢又向何處著落遂攬下火炬云返本還源祇者是輝天鑑地自如如。

青蓮老師火

明知生是不生之義因甚卻被生死之所流轉若向者裏會得烈焰綻青蓮馨香遍界該彌今又亙古無去亦無來既無去又無來是汝諸人還知者阿師落處麼遂攬炬云青山綠水全身現那箇男兒被活埋。

慧林禪人二親化柩

皮囊拋卻已多年猶自棲遲荒艸邊
驀地掀翻舊骨董分明絕後又光前
只如同條合命一句又作麼生道觀體元無異死生不二天。

木頂禪人火(因虎傷)

木禪人聽指示尋歷江山計有年
佐助宗師未遂志到頭一著自家知
撒手今朝安樂地大眾且作麼生是渠安樂
一句虎口翻身自在行大千何處不游戲。

朱解作明采火

若論此事如解水一般牽來拽去必得兩破始肯放手
只如放手後又作麼生符到奉行天已夜星河燦爛任翻身。

道戒禪人火

尋常用得著今朝都不是合眼細思惟安身在何處
道禪人休擬議遂擲火炬云只此明明不覆藏莫教錯過自家底。

慈濟禪德火

慈濟慈濟你卻分明到山纔一日撒手便歸程
生平受用無多子收拾春風入化城。
靈機觀禪師語錄卷六終

行狀

門人超正等稽首謹述

師諱行觀號靈機閩之龍溪周氏子母翁氏生師之夕夢一金神入室衛從頗盛忽香光馥郁而誕闔屬稱異師幼不茹葷及丱讀書山館偶觸無常境界遂與本郡慈雲師游有師資之誼一日默思禮誦非究竟事由是悲悵日增以至胸次負疼時費隱容老和尚主黃檗有僧持語錄至展讀如獲至寶屢欲往叩又為他緣所絆既而因事發憤曰大丈夫若以利養是圖則陷身不義矣遂舍去禮金浦九雲寺慧曇老師芟染曇耆年有道行為一方推重見師志不群乃欣然曰子乃法門令器詎可虛滯於此吾年雖邁當送子行

腳也即束裝偕師出嶺曇途次染恙趨寂於逆旅師拉淚津送入塔雲棲禮別渡江首參密老和尚於天童纔人事同謁僧擬問連遭痛棒師在傍佇顧被尚以杖騫胸一[祝/土]曰汝者死漢倒退階下心眼昏迷少頃乞進堂日用只疑騫胸一[祝/土]汝者死漢反覆看來我是活底因甚喚作死漢遇晚參師出問未審老和尚有佛性也無尚笑而起捻住喉嚨擺兩擺曰汝者阿子無佛性師彼時如在大火聚中跳出自此參究益切雖役重務未嘗放捨是冬稟受具足戒焉明年甲戌聞費老和尚應金粟之請復過武林休夏龍居偶閱禪關策進愈加猛礪灼見古人為生死不憚風霜三二十年方成一片了徹大事豈是容易得底於是晝夜常坐不臥只看個無字或倦即倚柱少息又得泉南脩上座警發師依而行之殊覺省力不勝欣忭期畢腰包上金粟見老和尚挂單禪堂踰月徹夜不眠恒立法堂前參究一夕雷雨驟作電光閃爍不覺無字話頭脫落山河大地凝成一片歡喜踴躍歸堂倒身便臥時鄰單問兄微耶何放逸若此師曰待我睡一睡向汝道一眾驚悚有止止師特入堂問一靈真性不假胞胎時如何師以手騫掩其口止不肯曰不是者個道理師高聲應曰三十年後乃趨入方丈問世尊未陞座文殊未白椎還有佛法也無語未卒尚拈拄杖徵曰且道即今是陞座不是陞座擬對便打出自忖我本惺惺為甚拶著又去不得遂移入圓寮每日只默坐不輕啟口尚見師真率命遷侍香一日因二僧請益尚據曰左邊半觔右邊八兩師於此豁然無疑呈百丈再參頌曰當機歷驗示全提忽地一聲絕謂情禍入己身猶自可那堪惡水又澆人尚閱畢復問頌也任汝頌且道三日耳聾意旨如何師沉吟間被尚振威一喝拈棒呵曰汝恁麼見解平地上死人無數當機不來盡成虛誑師是時白汗迸流會得全機大用復呈無字頌曰狗子無佛性當風須照顧擬議咬斷筋莫言不分付尚大笑稱賞從茲腳踏實地一切成現無纖毫窒礙不被從上佛祖舌頭欺瞞尚一日問興化打克賓意旨如何師曰憐兒不覺醜尚曰既打趁何謂憐兒師曰也要和尚具隻眼尚便掌曰要我具隻眼那師曰不是學人恁麼爭見得和尚尚休去又侍立次尚問世尊拈花意旨如何師騫豎拳尚曰不得喚作拳頭又作麼生師便與尚一拳尚打一棒曰且道是賞汝罰汝師曰少賣弄尚頷之師侍尚十載機緣頗多具載錄中一日尚謂師曰漳州出汝大似糞埽堆頭一顆明珠又曰汝是金粟門下一枝鳳毛汝之頌古宛有白雲端作略師雖屢蒙記莧益自謙晦崇禎癸未冬舉師立僧越明年解制師欲把茆住山以告尚從容謂曰昔仰山語臨濟老兄向後於河北有個住處後臨濟果在河北大闡宗風看來吾人住處亦有定分豈可強為師拜領慈誨未幾有湖州楊墳資福之命尚令侍者喚師至囑曰汝欲把茆今翔鳳山前有古寺基當就此居之師乃受命拜辭至山實甲申三月十有三日也師初住時闢艸開荒刈茆縛屋淒涼盈目豺虎為鄰人不堪其憂而師怡然獨樂師又律身最嚴同眾食息雖一果一菜不私於眾故禪學之士亦不辭勞苦戮力經營漸成叢席雖雲廚屢乏而參請無虛日單提向上勘驗方來由是雲水麀集辛亥秋復

主福嚴三稔甲寅九月眾請還山法席愈盛四方宿衲遠近緇素嚮風而至惟恐居後圍繞者不下十萬餘指矣於戲益知曩時老和尚為師諄諄囑付信有徵焉師住持資福三十八載凡樵採之山安僧之地尺寸皆售衣鉢親置師於茲山雖稱重興實開法第一世也始則艸屋荒基不蔽風雨終則瓊樓絳殿金碧交輝凡叢林所宜有者無不畢備兼之門庭嚴冷清規整肅諸方長輩咸推尊為楊岐高峰再世云師受生於萬曆丙辰正月廿三日寅刻示寂於康熙辛酉九月廿九日子時世壽六十有六僧臘四十有九遺命塔全身於本寺龍山之陽付囑弟子廿一人有語錄上下卷行於世。

翔鳳山顯忠崇孝資福禪寺靈機和尚塔銘

葬者藏也後世務為崇碑巨碣勒石徵詞諛墓已非古矣況宗門大士視其身不啻蘧廬之一宿暨乎埋骨荒丘鴻爪蟬翼無復顧戀而世之所號為能文者流乃以窺測傳會之見繪飾而塗澤之何足當識者之一笑乎雖然當正法凌夷魔鬼互熾而得一人焉特提向上宗旨壁立萬仞斬盡葛藤俾依聲附影之徒斂跡卻避其有功佛祖甚大則于靈機和尚身後之銘不得徒作語言文字會也師姓周閩之龍溪人諱行觀靈機其法號也母翁夢金神入室而生幼不茹葷血稍長讀書山中偶境觸無常遂懷出世之想有僧持費老人語錄至者反復省誦如飲沆瀣即芟染禮九雲寺慧曇為師曇一見歎曰子將來龍象詎可虛滯于此吾雖老尚能伴子八十行腳耳未幾曇以疾示寂旅次師拉淚津送如禮渡江首參密和尚痛加爐錘師自謂如火聚翻身參究益切是歲稟受具足戒每晝夜止看無字與泉南脩上座互相警發時費老人主席金粟師挂單禪榻一夕雷電驟至不覺無字話頭脫落山河大地凝成一片歡喜無量歸堂便臥鄰單問子徹也何放逸乃爾曰待酣睡後卻向汝道一眾驚悚師侍香次因二僧請益費老人曰左邊半觔右邊八兩師于此豁然呈百丈再參頌曰禍入己身猶自可那堪惡水又澆人隨勘驗以三日耳聾意旨沉吟間更遭呵罵汗下浹背益領會全機大用又呈無字頌深蒙印可從茲一切成現毫無窒礙機緣甚多俱悉語錄中費老人嘗語師曰汝之頌古大類白雲端真金粟門下鳳毛矣舉充首眾復囑曰汝欲把茆今翔鳳山前有古寺基當往居之師遂應楊墳資福之請始至誅茆縛椽荒涼窘乏師一果一蔬不以自私故學徒亦不辭況瘁經營漸成蘭若其後信施委積自殿宇以及寮舍庖湑煥然一新雖曰重興實與開山創建者等復主福嚴回值六十誕辰緇素雲集聽法不下十萬指至康熙辛酉九月二十九日泊然而逝距其生萬曆丙辰正月廿三日世壽六十有六僧臘四十有九遺命塔全身于本寺龍山之陽付囑弟子二十一人師門風高峻足跡不下山麓者三十年尤疾末學盲師語錄刊布之弊凡結制晚參諸語皆順世以後弟子追輯所聞什不存其一二此與雲門法語呵止流傳入其室者至以紙衣繕寫何多讓哉乙丑秋予謁笠翁和尚于理安而師之繼席

法嗣嵩菴道至翌旦笠翁遂以書抵會城介其座元夢菴來請笠翁為諸方碩果而師尤余素所企慕而不得見者乃稽首為之銘曰。

猗歟密祖	豎大法幢	天魔釋胄	不戰而降
費公繼之	梵門角虎	益火熾薪	舍利如雨
師生閩海	蓄泄雲濤	髭齡薙染	杜謝塵勞
瓢笠往來	天童金粟	熱喝猛提	黃葉止哭
研究精進	金斷石穿	孰主孰賓	有實有權
踰月經行	脅不帖席	獅子忽眠	同參褫魄
當機悟徹	撒手懸崖	法筵重寄	往哉汝諧
寶座雲邊	丹薨樹杪	不起于座	人天圍繞
末師稗敗	誑導群蒙	階前售拂	賤等秋蓬
師提祖印	擯棄一切	揀沙是金	畏門皆鐵
吉祥示化	師其未亡	晨鐘清夜	法音琅琅

康熙二十四年乙丑八月望日賜進士出身文林郎原任河南開封府祥符縣知縣行取大計卓異欽賜袍服薦舉博學宏辭賜宴體仁閣前彰德府推官癸卯科文武同考官遂安毛際可拜撰

先師語句恐學人泥於文字概不存稿雖有順世陞座小參諸法語書挂水牌隨命抹去不許謄錄翼自壬寅冬親近先師匝歲命入侍寮問諸久侍前職和尚所說法語機緣曾錄卷帙否僉曰未曾即有不過潛鈔密記一篇半偈而已爰是東鈔西錄哀集數篇候師住持事餘呈稿求正師正色曰既學別傳之旨咬人屎橛作麼翼再拜長跽白云二祖阿難為佛侍者凡佛先所說法未曾得聞懇求重說佛為慈愍未聞更為宣說所以阿難後來結集三藏如水傳器一字無遺趙州不許人錄至今語錄流播天壤至如鄉音南北楚夏不同智無慶喜之明識乏紙衣之敏互有潛鈔密記難免魚魯參差雖杜今時之弊反貽他日之瑕伏望和尚大慈俯垂覽正開示將來使正法眼流通末世師為動容矜翼愚衷指其字句差誤隨即錄正先師曰不可與人亂鈔禪和子眼腦不清烏焉成馬者多故翼謹秘篋笥不敢有違嚴命第愧記性愚拙不盡什之一二耳至康熙己未請假出山養母繡州稿亦懷之以歸辛酉九月初老人示疾遣人呼翼至榻給侍彌月至廿九日示寂嗚呼人天眼滅法棟傾頽翼等孤露無依碎身莫贖至印兄繼席翼欲請商結集語錄之事見至兄住持事冗因不敢言乃返禾中後至兄拊拾輯寫語錄稿尚未編定八月間復溘焉長逝由是嵩菴兄繼住無何先師薨度英衲師索先和尚語錄入都嵩兄即將至兄所集之稿送南澗敘次天笠和尚閱之乃曰因甚差誤多端大非昔年之句須得原稿方好況靈法兄真得大機用從胸流出一字一句不可改易嵩兄因北行遄促催請作序以冠卷首其中句逗字義種種差訛係前拊拾傳寫之錯非天和尚之咎斯時翼總罔聞後知之即送原稿入山業已刻行數年以來高閣不印海內禪人以不見先和尚語錄為憾江浙緇素曾讀刻本者又多以改誤為嫌翼見紛然異同欲將原稿

翻刻令大唐國內見先師真面目活語句以息意逆改壞之誚癸酉春備員鳳山值歲荒力薄日夕抱疚適新安白雲子素兄屢煩手扎促為刊正至有死亦瞑目之言因復其待時稍稔不但遵法兄命亦翼應為之事也去夏冒暑走雲間求沈南季護法與吳日千先生序以申重刻之由凡翼記集始末次序間嘗聞命先師一字一句不敢去取備錄而悉刻之以俟同門諸兄法眼或後繼起者再為刪刻翼之汲汲此役畏未刻者將淹沒無傳已刻者終差舛失正蓋出於不得已也且道先師正法眼果在斯錄不在斯錄閱者請下一轉語。

康熙三十四年七月佛歡喜日繼席翔鳳顯忠崇孝資福禪寺門人超翼百拜謹誌

重刻靈機老和尚語錄後跋

鳳山先老人道風孤峻有江南小釋迦之目煅煉學人單提向上一著凡衲子到山必搜索行笈不容挾片紙入參堂其生平語句敲骨見髓斬絕葛藤第不許繕寫流傳故人見之者罕迨老人示寂後有弟子某為入都行促匆匆鏤板舛誤頗多大展和尚慨然起而釐正之悉依當年親聞時紙衣所錄不敢增減隻字所謂游夏不能贊一詞也而老人真面目于是乎出矣從上祖師莫不有語錄垂世多或累函少或數紙皆所以開人天之眼目資來學之津梁使或淆訛舛錯則作者之光明埋沒何以開悟學人其獲法門不少和尚此舉良非得已也和尚繼席鳳山道不讓老人其光大祖庭功難為策勳第一光大祖庭屬家事而點出光明使諸方得見正法眼藏此天下萬世之利孟子之功豈在禹下哉錄成和尚命侍師益三來徵蕪詞附後余固初參和尚亦家裏人也烏敢辭焉。

乙亥七月七日平陽學人盛遠拜跋

CBETA 贊助資訊

[. \(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。（銀聯卡不支援定期定額）

[前往捐款](#)

劃撥捐款

郵政劃撥帳號: 5 0 4 6 8 2 8 5

戶名: 財團法人佛教電子佛典基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人佛教電子佛典基金會」。

For donations by check, please write the check to
"Comprehensive Buddhist Electronic Text Archive
Foundation".
